


Twipàcilà Tùsambòmbò

Twà Dimwènekela Dyà

Danyèlè Kùdì Ngabùdyèlè

 Kadi ndi mukème bikolè bwa...nsongà yetu mu dinda emu, tuu, nudi bamanyè's, tu-“fèfè,” ne tu-“fifi,” tutekète, twa...nudi bamanyè's, twa bidimu dikumi ne bisambombo atu. Nenku twikàle tùlwa mu ekeleeziya, nudi bamanyè's, twa bu...Twànà twa bakàji tutekète, twipacila bidimu abi, ntuswè kumwèka tulenga, nudi bamanyè's. Twòtù, nudi bamanyè's, nsuki yònsò myenza mvwàngalà, ku nsongo ya mitu yàtù aku; Mvwa mutùmòne, pàmvwà nyiisha apu, tutùngùnùke anu ne kwinaama panshi, kwinaama panshi. Kadi, paanyima pàà mutanci, bàvwa bàyèèla lupeepèlè bwa kuyùumusha mu mpala, nsuki ya mvwàngalà ayi yònsò myolòlòke.

² Mwànà mukese wa bakàji wa Mwaneetu wa bakàji Downing, nenku—nenku ngààmumònu. Nenku mwànà mukese—mukese—mukese...mukese wa Mwaneetu Collins...Dyèndè nganyì apa's? Kaa...[Mwanèètu kampànda ùdi wàmba ne: “Betty.”—Muf.] Betty, kaa'Betty kànà aku. Ngènjì anu bu wàsekì ndambu, mudìsekèlè's. Kadi ngàmònu twònsò anu tulenga, nudi bamanyè's, tudilongòlòle bimpè twònsò, ne pashiishe dyàkàmwè cìvwa... .

³ Ee, myoyi yenu yibeneshiibwe, bananga bàànyì, nudi balenga be, bwànyì mèmè, nansha bìshi. Ncya bushuwa. *Bulenga*, cìdi—cìdi nnyuma mulenga wàlwa kusòmba mu masangisha mushindu awu, ne kutèèleja Evanjeeliyo. Ki cìdi cìvwijà ne mwànà wa bakàji mulenga ncyòci aci. Ne mèmè ndi ngeela meeji ne mwànà wa balume kanà yònsò wa cya bushuwa ewu, udi mukùmbànyìne kusèlangana, ùdi wèla meeji amweamwe awu. [Mwaneetu Neville ùdi wàmba ne: “Amen.”—Muf.] Twasàkidila, mukalenge. Abi mbimpè. Muntu kampànda mmutwe ku cyànyì. Aci, ncya bushuwa. Eyo. Ndi mwiitabùuje ne aci m'Bulelèlè.

⁴ Mpindyewu, kacýènakù cikèmesha anyì? Ndi mubuulùle buludì mu Danyèlè 9 pàngàabuulùlù Bible wanyì. Mpindyewu, pa ciibidilu ntu ngambila bantu bònsò, bàdi ne mutèèlu mutùbùke disòsò abu ne, bwa kabàvùùlu kàzakù to, cìbi ndi ntèkemena ne wànyì pàànyì mutèèlu kí mmutùbùke to. Kadi ndi—kadi ndi mumòne cikondo cìmvwà ncýi mwa kukàvùùla to, bu mùmvwà ne mutèèlu mutùbùke disòsò, cya bushuwa

menemene. Kadi ndi ngeela meeji ne ewu nùnkù kí mmutùbùke disòsò to.

⁵ Mpinyewu, kaa, bwànyì mèmè mwine, twètù tudi . . . ne ndi ngeela meeji bwa batèeleji ne, tudi twanyisha Bwikadi bwa Nyuma Mwimpè mu dinda emu.

Ne tudi twanyisha bwobùmwè ne bwikadi bwa muntu ne mukwèndè. “Mbilinga be, mbîmpè be, bìdi byenza musàngèelu be, bwa bânà bàà muntu basòmbèle kaaba kàmwè mu bwobùmwè. Ncyenzè bu maanyì a dilaabiibwa a mushinga mukolè àdi àpwekelà ku mwedi wa Aalònà, too ne ku luzemba lwa mùzàbì wèndè.”

⁶ Mvwa muyè bwa kudya leelu ewu, ku Blue Boar kwàka, kadi bângàayi kasanganamu mbanganyi's anu Mwaneetu Bill ewu, ne Mwaneetu wa bakàjì Dauch basòmbè mwab'awu, biikàle anu—anu munkaci mwa kusùkumina nzòlo ùmwèka mulenga be, mukàlanga mu mushindu wà kacya ncìyikù mwanjì kumòna to, ne biikàle anu bàpicila mu cikondo cya dicyònkómoka, bakòpàkànàngàne nendè, nudi bamanye's. Mèmè kubànda mu nzubu wa kuulu kadi kùtwilanganamù ne citùpà cinènè cya ekeleeziya ewu, ki kuswàbo ne bwa kunsùmbila cyàkudya cya mundaamuunyà. Mpinyewu, abi's bìvwa bilenga bya dikema, ndi ngaanyisha aci.

⁷ Pàngàlùkidi kumbèlu, ki Billy ewu ne kashètè kàà tùmata kàvwa muntu kampànda muntwàdile, mufùmìne naakù kule ku ditungà dilenga dya citaleela dya Géorgie kwàka, kùdi citaleela cya menemene aku, mùdibo bàngambila's, mu cikondo citùdi eci.

⁸ Pashiishe, ndi mutwilàngàne ne nsongàalùmè kampànda pambèlu apa. Mvwa mfùmìna ku miyiiki yànyì ya babidi, mu mapingaja emu, nenku pàmvwà ngenda ndwa mwikàle mpìcila lwà ku ekeleeziya kùkaadi díbà dijimà ne citùpà, nenku mutekète . . . nsongàalùmè anu wetù ewu, pambèlu apu, yèyè ne. . . Mèmè kwamba ne: “Kùdi luuyà lukolè be.”

Yèyè ne: “S'lùdiku *bushòwà!*” Mèmè kumanya ne ùvwa wa ku Géorgie, ki yèyè ne: “Ncya bushuwa ne kùdi luuyà lukolè mu Géorgie!”

⁹ Ee, twètù tudi tukèba kwepela mwaba wà luuyà utàmbe bukolè, kí mmwòmò anyì? Kì citùdi bavwilè kaaba aka ncyòci aci.

¹⁰ Twasàkidilaayi wabúngì, nwènù balunda bàànyì, bwa bwîmpè bwenu bwònsò ebu. Mvwakù mèmè ewu mufwànyine kwenza cinyì bu nciyi neenù? Ncinyì—ncinyì menemene cìmvwàku anu mufwànyine kwenza bu nciyi neenù? Bu ne ncìvwakù ne muntu munnange to, muntu nansha umwe kàyikù mufwànyine kutèeleja Mukenji, Mukenji wànyì wònsò kawùvwakù mwa kwikala ne dikwàcisha nansha dikese to. Ncyèna mwa kuWùyiiisha makunji a telefone ne micì to. Byòbi

abi kí mbifwànyine kuwùmvwà to. Pa nanku bìdi bikèngela cìikalè bantu munùdi nwènù bônso aba, biikalà mwa kulwa kuwùtèèleja. Kadi panùdi nulwa nusòmba mu mwaba wà luuyà lukolè bu ewu, ne kwikàle. . . Mukàjàànyì ùvwa wàmba ne ùvwa anu bu wa kuuvuluka makòba lwà paanyima pàapa, mu dinda emu. Kadi pa kumòna bantu, misangu mikwabo babèèdi, basòmbe mu masangisha awu mushindu awu, Nzambi ànùpèèshèku cisòmbedi ci—cilenga, cilenga kumòna mu Butùmbi, ki disambila dyànyì ndyòdi adi. Ne ndi anu ntèkemena ne ngèyemena ne Yèyè neñzè nanku.

¹¹ Mpindyewu, twànji tùmonebi. Kàzakù kàànyì, muntu mmukàngate mwab'ewu. Nenku bikèngela mbalèku ndambu dilòòlò edi. Mbanganyì bàdi citùpà cya kumpala cya cyòci eci cibàsankisha? [Disangisha didi dyàmba ne: "Amen."—Muf.] Kaa, bu ne kakùvwa anu luuyà lukolè nanku to, tuvwa mwa kutùngunuka anu ne diya, anu nanku too ne mùdi lumingu lùjika, ne—ne Mukàndà wà Bwàkabuulwibwà. Mémè ndi muWùngè be. Mu Wòwò awu ki mùndi ne mwoyi. Nenku nùsambilàayikù, mu mushindu kampànda, mémè, lumingu elu, bwalu dyàlumingu dilwalwà ndi. . . Bu Mukalenge mwa kwanyisha, bikèngela nkafikè ku cyòci aci, kutèèka mbingu ayi kaaba kàmwè. Ne cyòci aci ncintu cìndi nciyi mumanyèku kantu nansha kàmwè to. Ne pa nanku nèngìikalè anu mwa kweyemena Mukalenge bwa ne Yèyè neikalè ne dyandamuna bwànyì mémè.

¹² Nenku nkàadi—nkàadi mubalè bantu kabùkabù bashiilàngàne bàtù—bàtù baakùlepù, bàtù bafùndepù. Ndi mubalè mèyi a kwinshi kwa mabeji kaaba aka, a Docteur Scofield, mumanyi munene wa dibàla, kadi ncyà bushuwa ne ncivwa mwa kutwà ku cyèndè to, pa àbùngi a ku mèyi èndè a kwinshi kwa mabeji, bwalu ncyèna mwa kucimòna mushindu awu to. Mwaba awu. . . Bikèngela bwa—bikèngela bwa cyòci kuvwija cimfwànyì cijaalàme.

¹³ Mpindyewu, wèwè ulamakaja puzzle, ne katanci aka, wamba ne: "Kaa, eci cyaaya lwà kuulu *eku*. To, ndi mutwishiiibwe ne eci cidi cikumbana lwà kuulu *eku*." Ee, bikèngela ùtangilè lwà kaaba aka ku citentwidi cyebe, bwa kumòna cyùdi wenza aci. Nenku dîbà adi wèwè—wèwè kùyi wènzà nanku to, neùpetè dinaya dyebe adi dibwelàkànàgàne dyònsò.

¹⁴ Kadi ambà tũng bu wèwè mwa kwangata. . .mwikàle ne dizòla dya mpàta kampanda munene, mulenga, kadi ngombe ùdiila bisoosà ku lusongo lwà mucì? Mpindyewu, aci kí ncifwànyine kwikala cijaalàme to (mmwòmò anyì?), bwalu yèyè kàtu ùdiila bisoosa ku lusongo lwà mucì to. Pa nanku, ki mùdìbi pàdìbi ne, wèwè, Nyuma Mwimpè kàyi mutwàngàje Mufùndù awu to. Dîbà adi, wèwè udi ne cimfwànyì mu kaabujimà, cinènè cya bupikudi. Ki citùdi twètù baswè, Bulelèlà abu. Ne patùdi anu katùyi bamanyè Bulelèlà to, netùcilekèlè anu nanku. Kadi dîbà adi, pàatùpèèshà Nzambi Bulelèlà, ee, dîbà adi nèngàakulèpu.

15 Nudi bamanyè cìdi bwalu anyì? Ngeela meeji ne Mwaneetu Roy Slaughter ne—ne bàmwè bàà bikondo bya kale mwab'ewu, bààkabangà kale wàwa kùkaadi ntàntà mule abu . . . Kùkaavwa bu, ngeela meeji, bidimu bisatu anyì binaayi bya kumpàlà bya mudimu wànyì wà bwambi, ku tabernacle eku mene, ncìvwakù nansha mufwànyine kuyiisha pa cyena-bwalu cya iferno to, bwalu ncìvwa mwa—mwa kuumvwa ní cìvwa mmwaba wà wùlàkuka kapyà, anyì ní cìvwa ndukità to. Ne musangu wònsò wùvwà Dìyì dyàmba ne, *lukità*, mvwa mpeta dikùdimuna, dyàmba ne, “*Hadès.*” *Hadès* “ndukità.” Musangu wònsò wùvwàDi dyàkula bwa iferno: “*Hadès*, lukità.” Nenku mvwa ncìshiya anu nanku too ne pàmvwà njandula cya bushuwa cìmvwà ngamba aci, pashiishe ki mèmè kuyiisha pa iferno, pa nanku pàngàakajandulà cya bushuwa cimfwànyì mu kabujimà ki mèmè kumòna mwaba wùvwàci. Bwalu, ndi ndyùmvwa ne mwambi mmwambùle bujitu kumpàlà kwa Nzambi, bwa cìdiye wàmbila disangisha adi aci, bwalu bòbò nebàshaalè anu kacya bààkwàta ku cyòci aci. Nenku, dìbà adi, ambàayi tũng bu mèmè mwa kubàfikisha ku dishàala bakwàte mwaba wùdi kawùyi wòwò, ne kulwakù dìbà dya ciine cìdìbo bakwàte aci kaciciyi cìshindama? Nwamònu anyì?

Nenku mu cìkèèna—kumòna cìvwa Mukalenge mumpèèshe aci, kùkaadi cikondo kampànda, pàvwà miliyò ayi . . . pàvwà Yèyè awu wàkula naanyì apu, wàkamba ne: “Neùlumbulwishiibwè, dyàmbedi, ku Evanjeeliyo ùdi muyiishè.”

16 Mèmè kwamba ne: “Mèmè ndi nyiisha cintu anu cimwecimwe cìvwà Pòlo muyiishè, ne bakwabo bònsò aci.”

17 Ki mèyì miliyò yònsò awu kwelawù lubilà lukole ne: “Pa cyòci aci ki patùdi bashindàmèène.” Ki cìvwàci. Nwamònu anyì? Cya bushuwa.

18 Pa nanku ndi muswe kutùngunuka dilòlò edi, mpindyewu, pa nanku katwàkutàmba kunènga to. Nenku mpindyewu kanùpukù mwoyi to . . . Mpindyewu, mu dinda emu . . . Ndi ne tuntu tukese tufùnda mwab'ewu. Mu dinda emu mvwa mwakùle pa Danyèlè mu bupika, Ngabùdyèlè ulwa kùdiye ùmuleeja kulonda kwa njila pa matùkù àcìvwà àlwa. Ki citùvwà balongè mu dinda emu, dilleeja dya njila pa matùkù àcìvwà àlwa.

19 Mpindyewu, dilòlò edi, tudi twakula pa *Twipàcilà Tùsambòmbò Twà Dimwènekela Dyà Danyèlè Kùdi Ngabùdyèlè*. Dyàlumingu dyàlondà, bu Mukalenge mwa kwanyisha, ditèèkà dya mbingu makumi mwandamutekète pa myaba yàyi, mwaba wùdi muyikumbèene, mu citùpà cya cikondo aci. Kadi tudi biimàne penyi? Mpindyewu, bu twètù anu mwa kupeta cyòci aci ne kucìvwija cya cijaadikiibwe, cilelèlè, dìbà adi netùmanyè anu menemene dìbà ditùdi ne mwoyi. Mpindyewu, katwàkumanya dìbà dyàlwàYe to; muntu nansha umwe kàakumanya aci to. Yesu

kí mmucimanyè to, Yèyè mwine. Wákamba ne Kávwa mumanye to. Wákamba ne anu Taatù, nkààyendè, ki uvwa mumanye aci. Nansha Banjelo biine kí mbacimanyè to. Nansha umwe wa kutùdi kí mmumanye díbà dyàlwàYe to, kadi tudi mwa kumanya dí—díbà ditùdi. . . cikondo citùdi ne mwoyi, kumanya anu mutùdi bafwànyine kwikala pabwìpi.

²⁰ Mpindyewu, bwa kulamakajakù ndambu ku bitùvwà baambe, bwalu bânà beetu bàdi munkaci mwa kukwàta byôbì ebi pa mikàbà ya mēyi. . . Bisanji bìdi munkaci mwa kunyunguluka mu cibambalu cidi paanyima apa. Ne mikàbà, mu bushuwa bwa bwalu, yidi yitùmiibwa, mu myaba yònsò.

²¹ Mpindyewu, dileesònà dya mu dinda emu edi, paanyima pàà twètù bamanè kumònonona nshapità mwi⁴ ne mwi⁵, pashiishe twètù kwangata. . . kubangila ku nshapità wa 9 wa Danyèlè. Nenku mpindyewu, dilòòlò edi, tudi tutùngunuka ne nshapità wa 9 awu. Kumpalà kwa twètù kukùlenga, twànji twinyikàayi anu mitù yetu bwa katanci bwa kwakulakù ne Mwena Diyì adi.

²² Nzambi wetù wa ngàsà, tudi batwishiiibwe ne Wèwè udi mumanye meeji mene a mu mwoyi wètù. Wèwè udi mumanye bwa cinyi tudi kaaba aka. Ne Udi mumanye ne katwèna balwè kaaba aka dilòòlò edi anu ne bwalu nkaaba kalenga kàà kulwa, bwa kwangata kaadiikisha kakese bwa mapingaja aa nansha. Taatù, ncyèná ngeela meeji ne kùdi muntu nansha umwe kaaba aka udi ne kiipàcilà aku to. Ndi ngiitabuuja ne tudi kaaba aka dilòòlò edi mbwalu tudi ne meeji matòòke a menemene, twambilamù, ne baswè kumanya EMU MMÛDÌ MUKALENGE WÀMBA.

²³ Tudi baKunangè, Mukalenge, ne tudi banangè Diyì Dyebe. Ne piikalàbi ne mwaba ewu ùdi Wèwè mutùlongòlwèle ewu, anu musàkà cyanàànà mwasa kuulu kwa mutù wètù, ne màdyòtò a nshààmendà aa, tudi ne kusàkidila Kùdi bwa kaaba aka. Bwalu, tudi twitabuuja ne kùdi Cisòmbedi dyàmwàmwà dya dyulu, kutùyayà bàtàngile aku. Kadi tudi tuvùluka bankambwa beetu bàvwà kabàyiku nansha ne diine dyèsè edi to, ne aci cidi cyèza ne myoyi yetu yinamè miikàle miwàcike bundù, Mukalenge, bwa patùdi mene tudyàbakeena apa.

²⁴ Mpindyewu, Taatù, tudi tulòmba bwa Ùtùkàngwilèku Mifundù, dilòòlò edi. Lwàku, wenda wendela ku luseke lwa muntu ne muntu wa kutùdi, patùdi twenda tupweka ne njila ewu dilòòlò edi apa. Akùlàku neetu muWàkaakulà ne bàvwà bàya ku Èmawùsè, bàfùmina ku Yèlusàlèma abu. Bwa ne, piikalà disangisha dijikè, dilòòlò edi, twamònakù mwa kwalukila ku mbànza yetu mishiiilèshiiilàngàne twenda twamba ne: “Myoyi yetu kayivwakù yilàkuka kapyà munda mwetu patùvwà tuMuumvwa wàkwila ku Diyì Dyèndè apu anyi!”

²⁵ Bènesàku kubala eku. Bènesàku didyènzeja dyànyì dya butekète edi, Mukalenge. Kàngulà mukana mwànyì bwa cidi cilelèlè, ne ùmùbwikidijè bwa cidi cibi. Ne dyàngacilèku Wèwè

mwine butùmbi, ne butùmbi mu cisàmbà Cyebe, bwa kumònabò díbà ditùdì ne mwoyi ne Dilwa dya Mukalenge Yesu dikaadi pabwîpi adi. Bwalu, tudi tulòmba nunku mu Dîna Dyèndè—Dyèndè, Dîna dya Yesu Kilisto. Amen.

²⁶ Mpindyewu, bwa kwalukilakù pa Mifùndù yetu bwa katanci kakese, tudi tusangana ne Danyèlè ùkaavwà mu bupika mwenzèmu bidimu kî mbîngi kî mbîngi makumi asambombo ne mwandamukùlù. Anji elààyibi meeji pa bwalu abu! Mpindyewu, wêwè ne dibeji dyebe ne crayon webè, wêwè uvwa kùyì mucipetè mu dinda emu awu, udi mwa kubyàngata dilòlò edi. Kuumukila ku cidimu cya 606 cya bikondo byetu ebi too ne ku cya 538. Umùshilaayi 538 ku 606, nudi nupeta bidimu makumi asambombo ne mwandamukùlù bikaavwà Danyèlè mwenzè mu . . .mwikàle mupika; kàyikù ne ekeleeziya wa diya, kàyikù ne mayiisha a ditèeleja, cintu nansha cimwe. Kadi ùvwa ne mikàndà kampànda, mikàndà mivùnga, yivwa mupròfetà uvwa mumudyànjdìle mwambe mu cipròfetà, ne mwine awu ùvwa—ùvwa n'Yelèmiyà.

²⁷ Mpindyewu, pàcìvwàye anu ùlonga Mifùndù apu, kumònayè ne díbà dikaavwa dyènda dijika, ne cikondo cya bidimu makumi mwandamutekète. . .Ne kakùyì tuseku to Danyèlè ùvwa wítabuujà díyì ne díyì òvwà Yelèmiyà mupròfetà awu mwambe. Ne mèmè ndi ngambila kàlaasà kàànyì aka, dilòlò edi ne: Bìvwa bikèngela twètù kwitabuujà bapròfetà beetu anyi? [Disangisha didi dyàmba ne: “Amen.”—Muf.] Eyowa's, mukalenge. Bwalu, Díyì dya Mukalenge òvwà dilwa kùdì bapròfetà. Bòbò mbàdì ne EMU MMÙDÌ MUKALENGÈ WÀMBA. Ne mupròfetà mulelèlè kàtukù ùseesuka ku—ku díyì dya mukwabo mupròfetà to. Kacya bòbò kabàtukù bènzà bwa Dyòdì kwamba cidìDi kadiyi dyàmba nansha. Nebàmbè menemene anu cidì mupròfetà mulelèlè mwambe, aci ki cidì cyènza ne yèyè ikalè mupròfetà. Díbà adi pàdìbo bàpeta aci, ne pashiishe bàdyànjlila kwamba cùikalà ne cya kulwa, bamanyè eci, biikàle ne diciina mu mwoyi wàbò, bwa kabàlu kwamba cintu kampànda cya mafi cya cifwànyine kupàmbwisha muntu kampànda. Twètù katùtukù baswe kwenza nanku nansha. Tudi baswe kakùyì mpatà to kwikala batwishìbwe ne tudi ne Díyì dya Mukalenge kumpàlè kwa kwamba EMU MMÙDÌ MUKALENGÈ WÀMBA. Nwamònu anyi? Cidì ne cya kwikala mukenji wà kawùyì wà kwela mpatà to, wùfùmina buludì ku Nkwasa wa butùmbi wa Nzambi, bwa cyanàànà kabìvwa bikèngela twètù kuwàmba nansha.

²⁸ Mpindyewu, pàcìvwàye anu ùlonga Mifùndù apu, kumònayè ne bidimu makumi mwandamutekète abi bikaavwa byènda bìjika. Pa nanku, bu mùkaavwàyemù bidimu makumi asambombo ne mwandamukùlù, kushààle bidimu bibidi kumpàla aku too ne pàvwà Nzambi mwa kwaluja cisàmbà Cyèndè mu buloba bwàbò.

Pàcìvwàye mu disambila apu, tudi tusangana ne kwàkalwa Mwanjelo wa bukolè mufumine mu Dyulu. Kùdikù muntu mwa kuvùluka dìnà Dyèndè anyi? [Disangisha dìdì dyàmba ne: “Ngabùdyèlè.”—Muf.] Ngabùdyèlè. Ne Yèyè ki Mwanjelo bwa ekeleeziya wa beena Yudà. Mbanganyi bàdì bamanyè nanku awu? Myaba yònsò, n’Ngabùdyèlè. Ngabùdyèlè mmùsànjeelà kùdì ekeleeziya, ekeleeziya wa beena Yudà; wàkalwa kùdì Mariya; Wàkalwa kùdì Zakàayi. Misangu yònsò, ùtu anu n’Ngabùdyèlè. Ne Yèyè ùdì umwe wa ku Banjelo banene bàà mu Dyulu. Ne Yèyè kàakatwàdilakù Mwaneetu Danyèlè mwoyi mulenga wà dikema wà kùdì Nzambi anyi! “Kaa, Danyèlè, mutàmbe kunangiibwa!”

²⁹ Aci kî ncifwànyìnekù kukwenza bilenga, pa kwela meeji ne Nzambi mmukunange? Bu ne mèmè ncìvwa munangiibwe bikolè to, mvwa anu mufwànyìne kuswa kumanya ne ndi munangiibwekù ndambu Kuulu kwàka, kadi nwèù? Bushuwa. Anu mu mushindu kampànda wà ne...Yèyè ùdì wèlakù meeji kùndì, ku musangu ne ku musangu, s’ncifwànyìne anu kwenza ne nswè kwela mbilà, pa kwela meeji ne Yèyè ùdì mene wela meeji kùndì. Ne twètù tudi ne ditiwìshiiibwa dya ne Yèyè ùdì ùtwèlela meeji cya bushuwa, bwalu: “Patùcìvwà bangènzàmpèkààtù, Kilisto wàkafwà pa kaaba keetu,” mwaneetu. Nenku, mpindyewu, twètù tuvwa beenyi kule ne Nzambi, mpindyewu mmutùseemèjè pabwìpì ne Nzambi ne mutùpèèshe cyeyà cya lupàndù lwetu, mbwena kwamba ne, Nyuma Mwìmpè. Ne biikàle ne diitabuuja muntwamu dìdì dītūtuntumunà kumutù kwa bintu bya pa buloba, ne twètù biikàle tubànda kumutù kwàbì. Aci’s ncyà butùmbi’s. Kì mmwòmò anyi? Eyo.

³⁰ Pàcìvwàye mu disambila, Ngabùdyèlè kulwa Yè kumwambila ne kakùvwa anu bidimu bikwabo bibidi bishààle kumpàlà kwa kwalukilabò mu buloba bwàbò to, kadi wàkamwambila kùvwà ditungà adi diya mu kaabujimà. Anjì elàayibi meeji ku bwalu abu! Kùvwàbò bàya mu kaabujimà, lwendu lwònsò lwà pa buloba, Ngabùdyèlè wàkalùumvwija Danyèlè. KwambaYè ne Úvwa mutùmiiibwe bwa kwambila Danyèlè cintu cinène eci. Mushindu mwine wùvwà mupròfetà awu ne cya kwikala mudyùmvwè’s wè! Ki kumwambilaYè ne kùvwa mbingu makumi mwandamutekète mikòsela cisàmbà, too ne ku dikùmbana dya maalu ónsò; ki cikondo cya nshìikidilu ncyòcì aci, pa nanku byònsò mbijikè, dikùmbana dya maalu ónsò. KwambaYè ne: “Kùdì mbingu makumi mwandamutekète.”

³¹ Bàmwè bantu bàdì bàcibala ne nngondo, bàmwè ne mmatùkù, bàmwè...Huh! Yòyi miikàle anu mbingu yetu ya cya bushuwa eyi, kùdì anu bidimu bitwè ku bibidi ne cyabinaayi cimwe, anyi cidimu cimwe ne cyabinaayi cimwe. Nenku, nwamònu’s, nudi...Ki pàdìbi bikèngela twètù kupeta mpòpò apu, bwa kwikala ne bulelela.

³² “Mbingu makumi mwandamutekète mmikòsela cisàmbà cyebe.” Mu kiipàcìlà kaayi? Bwa cinyi? Cisàmbà civwàbo bayikòsèle civwa ncyà nganyi? Cisàmbà cya Danyèlè, beena Yudà. Ne bàvwa bayikòsèle cinyi? Kí ng’anu Danyèlè nkààyendè to, kadi ne cimenga cya cijila cya Danyèlè; nwamònu’s, cimenga cya cijila cya Danyèlè. Mpindyewu, nwènu kàlaasà, cimenga cya cijila cya Danyèlè civwa ncyèpi aci? [Disangisha didi dyàmba ne: “Yelusàlèrà.”—Muf.] Yelusàlèrà.

³³ Nenku mpindyewu netwàngatè, pàmwàpa tùfikèku dilòòlò edi: Yelusàlèrà úvwa penyi? Nganyi wàkiibaka Yelusàlèrà? Kacya nukààdikù bakwèléle meeji anyi? Nganyi wàkiibaka Yelusàlèrà? Wàkiibakiibwa díbà kaayi? Netùkùfikè, paanyima pàà katanci. Nganyi wàkiibaka Yelusàlèrà? Balùmyànà wa yààya, s’nkaacintu kakese menemene kasokoka mu ditumba’s, kadi ncyà bushuwa ne Cidi cicyàmba. Eyowa’s, mukalenge. Nganyi wàkiibaka Yelusàlèrà, ne yèyè wàkiibakiibwa díbà kaayi? Eyo. Nenku ki cimenga cya cijila cya Danyèlè ncyòci aci.

³⁴ Ne tudi tuumvwa cya bushuwa ne cimenga aci, cikaadi mpindyewu mulawu bidimu binunu bibidi ebi aci, neciibakiibwè ne necijaadikiibwè cyàkàbìdi. Ne dikuukwila dya mu ntempelu nediteekiibwè anu mwàkadidi ku cibangidilu amu. Ncyà bushuwa. Yelusàlèrà neikalèku, mpindyewu, ne nekwikalè mulàmbù wà mashi, mulàmbù wà bwàcyàbwàcyà wùfidiibwa cyàkàbìdi anu mwàkadibi ku cibangidilu amu. Netùbwelè bikolè mu cyòci aci, ngeela meeji, dilòòlò edi, anyi byàbúngi byàci.

³⁵ Mpindyewu ndi muswe bwa nùmanyè, nwènu balunda bàànyi, bwa ne, mu dilenga dya byòbi bintu ebi, ndi cya bushuwa munkaci mwa kushiya ku luseke mbingu ne mbingu ya dilongesha. Kadi ndi anu mbilenga mu mushindu kampànda, bwa ne piikalà kuulu mwa katalala, anyi paanyima ndambu, patwàbwelà mu Bitampì Mwandamutekète abi, Mpànzà Mwandamutekète, Mpungi Mwandamutekète ayi, bintu byònsò abi, bwa ngaamòna mwa kuleedilakù ne kwamba ne: “Nudi bavùlùke mbingu makumi mwandamutekète ya Danyèlè ayi anyi? Nudi bavùlùke cikondo cya Ekeleeziya, pààkabàndàci, ne byàkenzekà abi anyi?” Ne mbingu makumi mwandamutekète ya Danyèlè eyi yidi yàngata cikondo cya kuumukila ku dibànda dya Ekeleeziya too ne ku dyalukila dya Ekeleeziya. Cipòòlò aci nciidiyì yàngata. Mpindyewu, mpindyewu, kí mbingu yònsò makumi mwandamutekète ya Danyèlè to; nciitùpà cyàyi. “Mbingu makumi mwandamutekète mmikòsa.”

³⁶ Mpindyewu, kùvwa twipàcìlà tusambombo mu dimumwènekela Dyèndè adi, ùmwambila civwà mwa kwenzeka. Mpindyewu, kùvwa twipàcìlà tusambombo mu dilwa Dyèndè amu. Mpindyewu, dilòòlò edi, ngeela meeji ne netùshiilè kaaba aka mu Mifundù emu mwaba wùtùvwà mu dinda emu awu, mwaba wùvwa twipàcìla tusambombo awu. Tudipù. Mpindyewu tudi tusangana ne kùvwa twipàcìlà tusambombo, kàmwè kàà ku

twòtò atu. Mpindyewu twangatàayi nshapità wa . . . ne mwinâyi, mvensa wa . . . ne mwinâyi. . . mvensa wa 24 wa nshapità wa 9 wa Danyèle.

Nenku *mbingu makumi mwandamutekète mmikòsela cisàmbà cyebe* . . .

Mpindyewu vùlukàayi ne, ki cyònsò cìikalà naaci lwendu lwenzà beena Izaleela pa buloba apa. Ki yìdi mikòsa. Mbingu makumi mwandamutekète nyìdi anu mikòsa cyanàànà. Ki yònsò yìdi mikòsela beena Yudà.

. . . *cisàmbà cyebe ne cimenga cyebe cya cijila*, . . .

Ki bwa cinyi, mbingu makumi mwandamutekète eyi, mpindyewu kayinùpicikù to, neyibuululè kubangila ku cikondo aci too ne ku ndekeelu wa beena Yudà, kabidi ne ku ndekeelu wa Yelusàlèma, too ne piibakiibwàku cimenga cipyacipyà. Mpindyewu, kaa, ndi ntèkemena ne tudi tubwelamù, bîmpè menemene ne mu ndòndò dilòlòlò edi.

. . . *mmikòsela cisàmbà cyebe ne cimenga cyebe cya cijila*, . . . (Bwa cinyi?) . . . *bwa kulekeesha dishipa dya mikenji*, . . .

³⁷ CyàkamwambilàYe ncinyi mpindyewu? Ûvwa ùteeta bwa kumanya ntàntà ùvwaci mwa kunènga. “Ndi mumanye ne tudi ku cikondo cya nshìkidilu.” Anu mutùdi twètù mpindyewu emu ne: “Mukalenge . . .”

³⁸ Mbanganyi mu kàlaasà aka, dilòlòlò edi, bàdi bìtabuuja ne tudi ku cikondo cya nshìkidilu? Ambaayi ne: “Amen.” [Disangisha didi dyamba ne: “Amen.”—Muf.] Twasàkidilaayi. Tudi ku nshìkidilu. Mpindyewu tudi tuteeta bwa kujandula, ku dikwacisha dya Nzambi ne, anu ntàntà wìkalaci mwa kunènga. Mmu dituku kaayi mutùdi ne mwoyi emu? Ki bwalu kaayi tudi twalukila ne twangata bapròfetàa aba, ne bikwabo, ne tuteeta bwa kujandula ne tudi penyì.

³⁹ Nenku ki cyàkenzà Danyèle. Wàkatàngija mpalà kùdi Nzambi. Mbanganyi bàdi babalè Danyèle 9 leelu? Elàayi byanza muulu. Eyo. Nudi numòna disambila dyèndè’s, mwàkenzàye ditonda dyèndè bwa cisàmbà cyèndè, ne ditonda dyèndè bwèndè yèyè mwine. Ûvwa muswe kwikala mutwìshìbwe bwa ne ùvwa mujandùle dîbà dîvwàbo ne cya kwalukila, bwalu ùvwa muswe bwa kulungolola bantu ku dyalukila adi.

Mpindyewu, cìndi nteeta kwenza, mbwa kujandula dîbà ditwàbandà, ne kulungolola bantu bwa kubàndabò, bàvwà badìlongòlòle abu. Nenku tudi batàngije mpalà yetu kùdi Nzambi, ku masambila ne misengeleelu, bwa kujandula ne: “Mukalenge, ndîbà kaayi ditùdi ne mwoyi edi?”

⁴⁰ Tudi bamòne bintu byònsò bishìlèshìlàngàne ebi byènzeka; tudi tumòna bàà pa buloba mu cimvundu cinène. Tudi tumòna ne dîbà dikaadi pawìpi. Muf-. . . mufundù wùdi ku cimanu,

byònsò byàkambà Nzambi abi. Tudi tuumvwa Mfumu wetù wa ditùngà wàmba bwa mvita mikwabo, munkaci mwa kulwa mpindyewu mene. Tudi tuumvwa dÿyi didyànjila kwamba ne: “Mu, kaa, mu mèbà makese paanyima pàà mvita, mbidyànjila kwamba ne matùngà neàshaalè anu lupwishi lwà volcan pa lwòlò.” Ne tudi bamanyè ne tudi naaci.

Pa nanku tudi bamanyè ne, kumpàla kwa aci kwenzekaci, Ekeleeziya ùdi ne cya kwikala muyè. Pa nanku: “Mukalenge, tudi penyì?” Ki bwa cinyi mèmè ndi ngiitabuuja ne Yèyè neàtùmanyishè. Tudi tutàngija mpàlà yetu ku dijandula. Mpindyewu, dyambedi, twänjääyi kujandula.

Mbingu makumi mwandamutekète mmikòsela cisàmbà cyebe, . . . cimenga cyebe cya cijila, bwa kulekeesha dishipa dya mikenji, . . . kujikija mpekaatu, ne kwenza dipungisha bwa bubì . . . kubweja bwakane bwa kashidi, . . . kutwà citampi ku cikèènà-kumòna ne ku cipròfetà, ne kwela Mutàmbe cijila maanyi.

⁴¹ Ki civwà twipàcilà tusambombo twa dimwènekelangana dya Ngabüdyèlè ntwòtù atu.

⁴² Mpindyewu tùbangàäyi, nomba wa kumpala. Nwènù baswe kucifùnda, nwènù bàdi ne crayons abu. Nombà wa kumpàla: “Bwa kulekeesha dishipa dya mikenji,” ki cintu cya kumpàla aci. Mpindyewu, bwa kulekeesha dishipa dya mikenji dya İzaleela, uvwa mushipe mikenji bwa kushikukila Nzambi, ki ciikalà dÿümusha dya dipeetu dya Yakòbò dya maalù a Nzambi.

Mpindyewu, bwa kupeta cyòci eci, tùbuululàäyi mu Loomò. Nshapità wa 11 wa Loomò, kubangila ku mvensa wa 21 wa Loomò 11. Mpindyewu tuyàäya batàngile ku cinyi? “Kulekeesha dishipa dya mikenji.” Loomò 11:21. Eyo.

Bwalu pùkalà Nzambi kàyi mulàmìnyìne ditàmba dya mu bufùki, . . . (Dìvwà diikàle nganyi? İzaleela.) . . . ùdimukè bwa kùikadi . . . kùikadi wàbènga kukulaminyina wèwè peebe.

Mpindyewu, ndi muswe bwa ne, panwikalà baalükile mu mèènù, nùkabalàäyi nshapità mujimà wa 11 ewu. Ndi mbala eci anu bwa . . . Nufundàäyi nshapità mujimà wa 11 awu, ne nùmubalàäyi.

. . . wàbènga kukulaminyina wèwè pèbè.

Mònaaku bwìmpè . . . disù dikolè bya Nzambi, pa aba bàdi badishinde, . . . kadi kùdi wèwè, bwìmpè, wèwè mutùngùnùke mu bwìmpè abu: bwa cyanàànà wèwè . . . neükoshiibwè, neükoshiibwè pèbè.

Ne bòbò pààbò, bòbò kabàyi batùngùngùke ne kushààla mu bupid- . . . bòbò kabàyi batùngùngùke ne kushààla mu bupidyà, nebàsosomekiibwèmu, bwalu Nzambi ùdi ne bukolè bwa kubàsosomekamù cyakàbìdi.

Nwamònu's, ùdi wàmba ne nekwikalè cikondo cyàkòshiiibwà bàà Bisàmbà bya bendè, ne Izaleela wàlukilamù cyàkàbìdì.

Bwalu pùikalàbì ne wêwè uvwa mukòshiiibwe ku—ku mucì wa olèvà wùvwà wà cisuku bilondèshile bufùkì awu (bàà Bisàmbà bya bendè), ne wêwè musomèkùibwe bibèngàngàne ne bufùkì. . .

Twètù tuvwa babèngàngàne ne bufùkì, beenyi, kakùyì luse bwètù twètù, katùyì ne Nzambi, katùyikù ne ditèkemena nansha dikese to. Kadi Nzambi, ku luse Lwèndè, bwa kutùpèèsha mpungà, wàkakòsa Izaleela mwakàne awu bwa dishipa dya mikenji, ne wàkabàsàka ku luseke, disw- . . . mucì wà olèvà wà kumbèlu awu, ne wàkabweja mucì wà olèvà wà cisuku, bibèngàngàne ne bufùkì.

. . . ku mucì. . . mwîmpè, ambààku tûng bôbò aba, bàdì matàmbà a mu bufùkì, mwàbèngàbo kusomekiibwa mu mucì wà olèvà wàbò sungasunga?

Eyo, tûtungunukàayi ne kubala.

Bwalu mèmè ncyèna muswe to, bàna beetu, bwa nwènù kwikala bapangè kumanya bwalu-busokoka ebu, bwa kanwikadi nwadimòna beena lungenyi mu dikumbana dyenu nwènù biine; difofomijiibwa adi mu citùpà ndyenzèke kùdì Izaleela, didi dyenzeke kùdì Izaleela, too ne pààbwelà . . . kaabujimà kàà bàà Bisàmbà bya bendè.

⁴³ Pàdì anu Nzambi kàyi mujikije ne bàà Bisàmbà bya bendè to, Izaleela uvwà anu mufofòmijiiibwe. Bààkaya kabwela mu mpekaatu too ne ku dishipa dya mikenji kumpàla kwa Nzambi, bwalu Nzambi wàkabàfofòmija mèsù, bwa twètù twamòna mwa kusomekiibwa. Nudi nucyùmvwà anyi? Mvensa wa 26 mpindyewu.

Ne pa nanku Izaleela mujimà neàsungidiibwè: . . .

⁴⁴ Nzambi wàkabàfofòmija ku bukole bwebe wêwè ne bwànyì mèmè. Kabèèna mwa kumòna to, bwalu Nzambi mmubàfofòmije. Kadi Izaleela mujimà, Izaleela mulelèlà awu, neàsungidiibwè. Cyàkambà Mwanjelo awu ncinyi? Butùmbi's we! "Bwa kulekeesha dishipa dya mikenji dya Izaleela! Ndi mulwe bwa kukwambila ne nekulwe cikondo cyàjikà dishipa dya mikenji dya Izaleela." Nzambi neàkosè ditàmbà dya cisuku adi, ne neàsomekè mwómò amu, cyàkàbìdì, ditàmbà dilelèlà adi.

⁴⁵ Kaa, cìdì misangu mikwabo citùpisha mwoyi wànyì's, pa kumòna bantu bàdì bakwàte ne bya luse, ne beena dikènga, bàvwà bakòshiiibwe kuntu kwàka abu, kabàyi bamanyè kùyaayàbo; ne pa kwela meeji mùvwà Nzambi, mu luse Lwèndè, mwenzè cyòcì aci bwa mèmè ewu ngaamònakù mwa kusungidiibwa. Mubàfofòmije mèsù bwa kabàmònu Maasiyà wabò sungasunga, mubàjike macì bwa kabàpeci mushindu wà

kuMutèeleja to; kadi pààbò, bàtàngila buludi bishimà Byèndè, ne bàtàngila buludi bishimà Byèndè ne bikwabo bivwàYe wènza's.

⁴⁶ Maataàyi, ngeela meeji, nshapità wa 12, anyi nshapità wa 8 anyi wa 12, mmwambe ne: “Nansha mùvwà Yesu mwenzè bishimà búngibi amu, kadi bóbò kabàvwakù mwa kwitabuuja to.” Bwalu, Nzambi wákamba ne: “Bàdi ne mèsù kadi kabèèna mwa kumòna, ne maci kadi kabèèna mwa kuumvwa to; bwa kabàlu kumòna ne mèsù àbò ne kuumvwa ne maci àbò, ne Mémè ncilu kubàkùdimwisha mucima.” Kadi, bwa twamònakù mwa kupeta mpùngà, Yèyè wàkakòka rìdò e kumupwekeshila pa mèsù a bânà Bèndè Sungasunga, kwipata bânà Bèndè Sungasunga ku mèsà, ne kubàsaka mu dinyaanunuka dya mu Nyuma, bwa Wàmòna mwa kupeta... bwa twamòna mwa kupeta mpùngà wa kwikalakù ne mwoyi, ùtùpèèsha Mwoyi. Mvensà wa 26, cyàkàbìdi.

Ne pa nanku Izaleela mujimà neàsungidiibwè, mùdìbi bifundùbwe, Nekùpatukè Musungidi mu Sionà, ne neàcingululè dipeetù dya maalu a Nzambi ùdùmusha kùdi Yakòbò.

⁴⁷ Eyowa, Yèyè nealwe ku Mukùnù wà Sionà, dimwe dya ku matùkù àdi panshi aa. Pa Mukùnà wa Olèvà, bóbò nebàMujingùlulè, ne Izaleela mujimà neàmanyè ne n'Yèyè. Bwalu bwa bàà Bisàmbà bya bendè nebwikalè bùjikè dìbà adi. Ditàmbà dyàkasomekàbo adi, Nzambi neàngatè mamuma àkapòòdiibwàku awu. Nenku ditàmbà dya cisuku adi nedìikalè... .

⁴⁸ Nenku mpindyewu vùlukàayi ne, lwà kuulu eku panùdi nubala apu, Yèyè mmwambe ne: “Byòbì ne muji awu wùvwa wà cijila, ne muji awu wùvwa Muji wà cijila, mamuma àdi àfùminà ku Muji wà cijila awu neàkwamè pààwù mamuma a cijila.” Nenku byòbì ne Muji awu wùvwa n'Yesu Kilisto, Yèyè udi Muji ne Mütòlokù wà Davidi awu; byòbì ne Mwoyi wùvwa mu Yèyè awu, wàkabànda kupicila mu lukòngò lwà beena Yudà ne bàakakòshiiwbakù, ne mèsù àbò àkafofomijiibwa bwa twètù kumòna, nebikengelè bwa nsòmbelu yetu kukùmbananganayi ne Ditàmbà dibènèshiiwbwe adi. Kaa, eyowa's, mwaneetu. Aci's ncyà bushuwa.

⁴⁹ Nzambi ngwàkabàkòsa, ku bukole, ne kubàfofomija mèsù bwa twètù twamònakù mwa kupeta mushindu wà kumòna, mutùpèèshe mpùngà. Kadi ki twètù kutwa eku kutwa eku bu ne tudi kampànda. Pòlò ùdi ùbàmbila kaaba aka ne: “Wadìmuka, mushindu wùdi wenza ciinè aci awu. Wadìmuka! Bwalu pìikalà Nzambi kàyi mulaminyine ditàmbà dya cifùkilu, mmunyi mwàtambàYe kwikala ne luse bwa ditàmbà dya cisuku dikaadi dimanè... .”

Ki twètù abu tutwà eku tutwà eku, twamba ne: “Ndi Presbytérien! Ndi Méthodiste! Ndi Baptiste! Ndi mwena Mpenta!” Bwa Nzambi abi kabyèna ne cidìbi byàmba to. Bidi bikèngela ùlediibwè cyàkàbìdì kùdì Nyuma Mwímpè udi ufùmina mu Muji awu. Kadi Yéyè mmufùmìne. . .

⁵⁰ Mpindyewu, vùlukàayi ne, Yéyè kèna wàkula bwa bàà Bisàmbà bya bendè to. Ndi anu ngeela cyôci eci emu nunku bwa nùmonè mwaba wùdì bàà Bisàmbà bya bendè bàpetela wabò mpùngà.

⁵¹ Kadi, Yéyè wàkalwa bwa “kulekeesha dishipa dya mikenji,” bwa kudjikija. Mpindyewu, twètù baalùkile cyàkàbìdì mu Danyèlè, netùsanganè ne mu Danyèlè amu, tudi tusangana kaaba aka, mvensà wa 24. Eyo. “Bwa kulekeesha dishipa dya mikenji.” Kulekeesha cinyi? Kulekeesha dishipa dya mikenji dya Izaleela.

Dishipa dya mikenji ncinyi? Nkulwisha cintu kampànda. Dishipa dya mukenji wànyi, nkungenzela cintu cibi. Kushipa mukenji wèbè, nkukwenzela cintu cibi.

Pa nanku, Izaleela wàkenzela Nzambi cintu cibi. Kadi mu lumingu lwà makumi mwandamutekète elu, cyènzekà ncinyi? Nzambi neàlekeeshè dishipa dya mikenji dya Izaleela. “Kulekeesha dishipa dya mikenji,” neciikalè, “kucinguluja dipeetù dya maalù a Nzambi kudyùmusha kùdì Yakòbò.” Ne díbà adi Izaleela mujimà neàlediibwè cyàkàbìdì. Bònsò nebàpetè Nyuma Mwímpè.

Mpindyewu, nombà mwibìdì, fùndaayi aci pa mabeji ènù apu.

⁵² Tudi bafwànyine kushàalapù ntààntà mule, kadi ncyèna muswe kuditwa mu diciyiisha to. Ndi muswe anu kuyiikila neenù, bwa nwamòna mwa kucyùmva mu ndòndò. Patwàbwelà mu Bitampì Mwandamutekète ebi, díbà adi nenùtungunukè mu dilonga dya Ekeleeziya, dya Bitampì, dya Bipùpù, ne nenùmanyè mwaba wutùdì biimànyine. Eyo.

⁵³ Nombà mwibìdì: “Kujikija mpekaatu.” Tùbalàayi cyàkàbìdì mpindyewu, Danyèlè.

. . . *kulekeesha . . . dishipa dya mikenji, ne—ne kujikija mpekaatu, . . .*

Ki kiipàcìlà kiibìdì kàà dilwa Dyèndè. Kàà kumpàla, kulekeesha dishipa dya mikenji dya Izaleela; ne kujikija mpekaatu. Izaleela wàkenzela mpekaatu penyi? Bààkenzela mpekaatu wabò walufù penyi? Bààkatàpulukila ne Nzambi penyi?

⁵⁴ Mpindyewu tèèlejàayi ne ntèmà. Tùbuululàayi mu Maatàayi Munsantu 24. Nenku apa mpààkenzelà Izaleela cilèmà cyèndè cya lufù. Apa mpààkenzelàye mpekaatu wendè wa ndekeelu, ne ki cidì cyènzè ne yéyè ikalè mu ngiikàdilù wudiyè leelu ewu. Maatàayi, nshapità wa 27 wa Evanjeeliyo wa Maatàayi

Munsantu, ku mvensà wa 25 wa nshapità wa 27. Tùbangilàayi lwà ku mvensà wa—wa 21.

Nguwènà wàkabàdamuna e kwambayè ne: Ngwèpì wa ku babidi aba unùdi baswe bwa nnùlekèèlè? Ki kwambabò ne: Baalàbààsà.

Mpindyewu vùlukàayi ne, ny'Zaleela awu. “Baalàbààsà!”

Pilaatù kubàambilayè ne: Nèngènzè cinyi. . . ne Yesu udibò bàbùkila ne n'Kilisto ewu? (Bàtèèlèjàayaaku!) Bònsò e kumwambilabò ne: Bàmupoopèlè pa nkùrusè.

Vùlukàayi ne, ki Maasiyà wabò uvwa Danyèlè mwambe ne ùvwa ulwa awu. Vùlukàayi mu dinda emu, mu dìleesònà edi ne: “Yèyè neàkoshiibwè, kacyi Bwèndè Yèyè mwine to,” kàyi ne cidìYe mwenze nansha cimwe to.

. . . *Bàmupoopèlè pa nkùrusè.*

Ki nguwènà kwambayè ne: Bwa cinyi, mbubi kaayi bùdiye mwenzè? Kadi bóbò bààkeela kabidi lubilà lukolè, bamba ne: Bàmupoopèlè pa nkùrusè.

Dìbà adi Pilaatù kumònayè ne kàvwa ne cintu nansha cimwe cìvwa ye mufwànyine kupeta to, kadi. . . anu mutooyi ngùvwà wènjùbwà, ki kwangatayè màyi, ne kwowayè ku byanza kumpàla kwa musumbà wà bantu awu, wamba ne: Mèmè ncyèna ne dipùla dya mashi a mutangilàayi. . . bwalu abu.

55 Tèèlèjàayi! Ki cilèmà cyabo ncyòci eci. Ki mpekaatu wabò nyèyè ewu.

Dìbà adi bantu. . . kwandamuna, e kwambabò ne: Mashi èndè ikalè pambidi pèètù, ne pàà bânà bèètù balela.

56 Ki mwaba ngwôwò awu wàkacyènzàbo. Yèyè ùvwa munkaci mwa kubàjikijila mpekaatu. Mmunyì mùvwàYe mwa kwenzakù cingà cintu pa kumusha kubàfwila kwa luse, mumanye ne bìvwa bikèngela bwa kubàfomijaYè mèsù, bwa twamòna mwa kubwela? S'mbyenzè anu bu ne bânà Bèndè Sungasunga bàvwa bàlòmba Mashì Èndè's. Nenku bóbò bàvwa bafòfòmijìbwe, ne Yèyè ùvwa mumanye ne bàvwa bafòfòmijìbwe. Ki bwa cinyi Wàkeela lubilà ùbàlòmbela luse. “Bàfwilè luse, Taatù, bwalu kì mbamanyè cidìbo bènza aci to.” Bàvwa mpofo. Mbwa bwalu bwètù twètù bùvwàbo bafòfòmijìbwe. Mù bupidya bwàbò mmwàkenzàbo cyòci eci. Kadi pààMumònàbo cyàkàbìdì. . . Amen!

57 “Kujikija mpekaatu.” Mpekaatu ncinyi? Bupidya. Kabàvwa biitàbùùje ne ùvwa m'Maasiyà awu to. Kabàvwa bafwànyine kumòna ne Yèyè awu ki ùvwa Maasiyà to, kadi pààbì's Yèyè wàkenza cimanyinu ne cimanyinu cyònsò cìvwà Maasiyà ne cya kwenza. Kadi bóbò kabàvwa mwa kucimònakù to. Bàvwa mpofo.

⁵⁸ Pa nanku panùdì numòna bantu bàmba ne: “Mémè ncyèna ngiitabuuja dyondopa dya kùdì Nzambi to. Ncyèna mwa kudimòna to. Ncyèna mwa kumòna dibàtiiza dya Nyuma Mwímpè edi to.” Kanùbàfikidi munda to; bàdi mpofo. Bàdi bàmba ne: “Ncyèna mwa kumòna Mukenji wà Dilwa Dyèndè ewu to. Ncyèna mwa kumòna dibàtiiza dya Nyuma Mwímpè edi to. Ncyèna mwa kumòna dimiinu dya nyòka to. Ncyèna mwa kumòna bintàkanyì ebi to.” Bàdi mpofo, kadi kabàyi bamanyè to. Nùbàsambidilaayi anu cyanààna. Eyo.

⁵⁹ Mu bupidyà bwàbò amu; kadi, pààmumònàbo, pààlwàYe cyàkàbìdì apu, necìjikijè bupidyà bwàbò abu. Kaa, ekelekele! Twànjàayi anu kubuulula mu Genese ku 25, nshapità wa 45, bwa tùpetè cì—cifwànyikijilu cyàcì. Ndi mubifunde ndambu kaaba aka, bya mu Genese 45 abi, nwènù bàdi bàfùnda tuubintu pa mabeji abu. Kaa, mushindu mwine wùndì munange Evanjeeliyo mwímpè wa kale ewu’s wè! Eyo. Mpindyewu tudi bamanyè mwaba wutùdì.

Nudi mwa kungumvwa bìmpè anyì, mundekeelu mwa citanda mwàmwà? Ela cyanza muulu pawikalà mwa kungumvwa. Ndi mutèèke eci pabwìpì ndambu.

⁶⁰ Mpindyewu netwikalè mwa kubala citùpà cya Mufùndù ewu. Ndi muswe bwa nùteelejè, nwènù bàdi kanùyì ne Bible abu. Nwènù bàdi ne Bible, n’Genese. Dyambedi, tùbangilàayi mu nshapità wa 44, kubangila ku mvensà wa 27.

⁶¹ N’Yòzefù, ne Yòzefù ùvwa cifwànyikijilu cipwàngàne cya Kilisto. Aci tudi bamanyè. Mbanganyì bàdi bamanyè aci? Mukina kùdì bânà bààbò. Bwa cinyì? bwalu ùvwa wa nyuma, ùvwa ùmòna bikèènà-kumòna, ùmvwija bilòòtà. Yèyè ùvwa muntu wa nyuma munkaci mwa bânà bààbò, nenku kumukinabò. Kadi tatwèndè ùvwa mumunangè.

Ki mùvwà Yesu pèndè mukina kùdì maèkèleeziyà a cyenamàngumba, kadi munanga kùdì Taatù Wendè Nzambi. Bàvwa baMukìne bwa cinyì? Bwalu ùvwa wa nyuma. Bwalu. . . Bàvwa bàmba, bààkamba ne Yèyè ùvwa mwena lubùkù, démon.

⁶² Nudi bavùlùke bânà bààbò ne Yòzefù cyàkamwambàbo anyì? “Ki mulòoci wa bilòòtà awu ulwàlwa ewu.” Nwamònu anyì? Nwamònu’s, cintu cimwecimwe aci. Ki kusùmbishabò Yòzefù pabwìpì ne ku mushinga wumwewumwe wà bwena ùvwà Yudaàsà musùmbishe naawù Yesu awu, bìnjànjà bya argent makumi asatu. Kumwimanshabò mu dijìmbà, kadi kuya kambilabò tatwàbò ne cintu kampànda ncimushebèye, mufwè. Kadi kumupàtulabò mu dijìmbà amu. Kilisto wàkiimanshiibwa mu dijìmbà, ne wàkapàtudiibwamù. Ne pààkapàtukayèmu wàkaya mu mwaba mutàmbe kutùmbuka wùvwàku pa buloba. Amen! Yòzefù wàkaya ku dyàbalùmè dya Pàlò; ne Yesu wàkaya ku dyàbalùmè dya Nzambi. Mu diteeciibwa dyèndè,

kumpàla kwa dibàndishiibwa dyèndè... Yesu, kumpàla kwa kubàndishiibwa Yè, wàkacipila ku diteeciibwa.

⁶³ Mona's, ngeela meeji ne ùvwa m' Billy Sunday, mutangadiki munene awu, uvwa mwambe ne: "Ku mucì ne mucì wònsò—wònsò kùvwa kusòmbè Banjelo mùlìyò mujimà, dituku dya dipoopodiibwa dya pa nkùrusè adi, bàmba ne: 'Lekèlèlà anu cyanza Cyebe cyanaànà ùfunkunè kutùdi. Twètù netùshintululè cyalu cidì apa eci.'" Kadi Yèyè kàvwa mwa kucyènza nansha.

⁶⁴ Kayifaàsè kwambayè ne: "Mmudisùngile yèyè mwine; bakwabo kaayi kàyi ùbàsùngila." Kàvwa mumanye ne civwa mmukana ùlaka to. Bu ne Wàkadisùngila Yèyè mwine, nunku kì mMusùngile bakwabo to. Pa nanku, Wàkadifila Yèyè mwine, bwa kusùngila bakwabo. Nwamònu's, mpofò ya dikèma bwa kucimòna. Mpindyewu bóbò. . .

⁶⁵ Nenukù pàvwàye kuntwaku mu dibàndishiibwa dyèndè adi apu, anyi, kumpàla kwa dibàndishiibwa dyèndè adi, diteeciibwa dyèndè. . . Vùlukàayi ne, Yòzefù wàkeediibwa mu bùlokò bwalu kàvwa mwenzè bwalu to.

⁶⁶ Kalàalà kàa masalaayi kàa beena Loomò, anyi, kàa beena Izaleela aku, Pootifà; Pootifà wàkaya, ne kuyayè ku lwendu. Ùvwa ne mukàj mulenga kwìsù, ne mukàjèndè awu kubiiikidishayè Yòzefù bwa àbwelè mu nzubu bwa kwenzayè cintu kampànda, kadi kuteetayè bwa kufikisha Yòzefù ku dyenza dya bwalu bubì. Kadi yèyè ùvwa ne lulamatu kùdi Nzambi. Ndi nnwàmabila's, bóbò misangu yònsò bàtu anu. . .

⁶⁷ Nwènu bakàji, s'nkàadi munwèlèlèlèlèle mbilà; mpindyewu nèngiikalè mwa kunwàkwilakù, ndambu. Nwamònu anyi? Mukàji ndupànza lwà lutàmbe kwikala lwà butekète. Ndi mumanye ne kakwèna mwa kwikala mulùme mubi kumpàla kwa kwikalakù mukàji mubi to. Kadi muntu mulùme udi mumanye ne—muntu mulùme udi mumanye ne udi mwànà wa balùme wa Nzambi, kadi ùbwelela pa butekète bwa mukaji, bundù bwebe; cidì mukàji awu wènza nansha ciikàle cinyi. Yèyè ndupànza lwà lutàmbe kwikala lwà butekète, ne wèwè udi mumanye aci. Mukaji yèyè ùpàtuka, wènza maalu kàyi bu inàbànza to, mukwàkè ku cyanza ùyiiikilanganè nendù bu mwaneenu wa bakàji. Wèwè's udi mwànà wa balùme wa Nzambi. Kwènji bintu bibì abi to. Tàngilà Yòzefù, yèyè's ùvwa cileejilu kùdi.

⁶⁸ Nenukù pàvwà mukàji wa Potifà awu, mukàji mulenga kwìsù awu, wa kuneemeekiibwa, wa milongo ya kuulu menemene, umwe wa ku bakàji bàà milongo ya kuulu menemene bàvwàku mu ditùngà amu, kumusèngeleelayè ne kumuswìshishayè. Kadi yèyè kukùdimuka, kadi mukàji awu kumukwàta ne kuteetayè bwa kumulamika pambidi pèndè. Ki kudikùpayè too ne mwàkalwàye mene kuvùla cinkutu cyèndè, ne kunyeemayè mukàji awu. Eyowa's, mukalenge. Kadi pàakaalukilàye, kumushiminyinabò bwalu, kwambabò ne yèyè

nguvwa mubwelèle mukaji awu bwa kulààlayè nendè ku bukole, ne kushiyayè...ne kushiyayè cinkutu cyèndè mwaba awu. Nenku bwa cyôci aci yêyè kabwela mu kàshô. Kadi, mu kàshô amu, Nzambi nyawu ùvwa nendè, mwaba wùvwàbo bamwelè nansha mwikàle wà bishi.

⁶⁹ Yêyè ùvwa cifwànyikijilu cya Mwànà wa ditanta. Cyônsò civwà Yòzefù wènza civwa anu citanta. Ne pààlukilà Yesu mu Bukalenge bwa bidimu cinunu, ki bwa cinyi bipèèlà nebisampilè bu cilòngò cya rose. Cyônsò cidiYe wènza necitantè. Yêyè m'Mwànà wa ditanta. Kwônsò kunùvwà nutèka Yòzefù, kùvwa kùbèneshiibwa. Kwônsò kùdi Yesu, nkubèneshiibwe. Pa nanku, Mwangàtè mu mwoyi wèbè ùbeneshiibwè.

⁷⁰ Pa nanku mpindyewu, tudi tusangana ne, Yòzefù dîbà adi wàkeediibwa mu bùlokò. Ne mu bùlokò amu mùvwa bantu balùme babidi; umwe wa kùdîbo wàkajìmina, ne umwe wàkasùngidiibwa. Yesu, mu diteeciibwa Dyèndè pa nkùrusè, mwîvi umwe wàkajìmina ne mukwabo wàkasùngidiibwa.

⁷¹ PààkabàndishiibwàYe, Wàkaya ku dyàbalùme dya Nzambi. Pààkabàndishiibwà Yòzefù, wàkaya ku dyàbalùme dya Pàlò, ne muntu nansha umwe kàvwakù mwa kwakula ne Pàlò kàyì mwanjì kwakula ne Yòzefù bwa kupeta dyanyisha to.

Ne pàvwà Yòzefù ùmuka mu nzubu wa bukalenge...Kàà, ekelekele! Pàvwà Yòzefù ùmuka mu nzubu wa bukalenge, mpungi yivwa yidila, ne bantu bàvwa bànyeema kumpàlà kwèndè, bènda bàmba ne: “Twàyi binù! Yòzefù nya' wiya!” Amen!

Ne pùùmukà Yesu ku dyàbalùmè dya Mutàmbe bunene, mpungi neyidilè. Ne cinù cyônsò necitwe panshi, ne ludimì lwônsò nelùjikulè ne: “Yesu nya' wiyee!” Bushuwa's! Kadi byôbì ne... .

⁷² Nenku, vùlukàayi ne, pààkabèngiibwàye kùdi bânà bààbo apu, cyàkenzàye ncinyi? Wàkasèla mukàjì wa bàà Bisàmbà bya bendè; wàkasèla mukàjì wa beena Èjjiipitù. Pààkakòshiibwà Yesu kùdi bânà Bààbò kuntu kwàka, beena Yudà abu, Wàkasèla Mukàjì wa bàà Bisàmbà bya bendè. Kadi mpindyewu, paanyimà pàà bidimu, paanyimà pàà bânà bamanè kulediibwa, Èfàlàyimà ne Maanàsè, yêyè wàkapeta dîkù.

⁷³ Pashìishe, dîngà ditùkù, bânà bààbò kulwabò bwa kumumwènekela. Tàngilàayi. Tudi bamanyè bwalu-bulonda abu, mwàkeelàye kaacintu kakese muntwamu, bwa kubàpingajayè. Ne mwàkenzàye bu ne kàvwa mumanyèku nansha mwa kwakula mwakulu wàbò to; kwangatayè mwandamunyi, wa bwa beena Ebèlù abu, kadi pèndè yêyè mwine mwikàle mwena Ebèlù. Pèndè ùvwa mwanaabo uvwa mulwèmu awu. Bôbò kabàyi bàmumanyè to. Ùvwa mfumu wa bukole.

Nenku patùdi twakulangana apa, Kilisto ùdi wèndela beena Yudà, wòndopa babèedi bààbò ne bikwabo, kadi bóbò kabèèna anu bàmanyè ne Yèyè ùdi Nganyì to, Maasiyà awu.

Tùbangilàayi ku mvensà wa 27 wa nshapità wa 44.

Ne musadidi webè taatù wanyì mmutwāmbile ne: S'nudi bamanyè ne mukàjàanyi ùwa mundelèle— mukàjàanyi ùwa mundelèle bàà bàà balume babidi,

Ne umwe wa kùdibo wākaya kunshīya . . .

Ûvwa n'Yòzefù, mwine ùvwabò bàākula nendè awu.

. . .ne mēmè kwamba ne: Ncyā bushuwa ne yèyè mmusūsula mushiya tusunya tusunya; ne ncyākamumònakù to kubangila anu apu.

Kadi nwènù bangumūshe ne ewu kabidi, ne dyākabi kumufikiladi, nenūbwejè nsukì yànyì ya mvya eyi ne kanyinganyinga mu lukità.

⁷⁴ Kuyabò ne Benyàminà mutekète awu kuntwaku, mwakūnyèndè awu. Nudi bamanyè udi Benyàminà ùleēja anyì? Musumbà mupyamūpyà ewu wa beena Yudà balelèlè, bashūwashūwàlè abu bàdi munkaci mwa kudisanga kuntu kwàka mpindyewu bwa kwenza binunu lukàmà ne makumi anaayi ne binaayi abi, cisà cìdi munkaci mwa kujuuka eci—eci. Kì mbacinguludi bàà mfranga ya bendè bàà ku Wall Street aba to, to, to; abu ntùmwe tuzòolò twa kumana naatu mikiiyà. Abu kí mbeena Yudà to. Abu kí mbeena Yudà to. Beena Yudà balelèlè mba-Benyàminà batekète bàdi munkaci mwa kujuukilà kuntweku aba, ne kabàyikù nansha banji kuumvwa bàmba bwa Diyì dya Yesu Kilisto to.

Mpindyewu ki bwa cinyi mulwe kùndi . . .ne taatù webè . . .ne taatù wanyì, ne mwànà wa kambodyoto awu kàyi neetù to, pa kumòna ne mwoyi wèndè mmuswikila ku mwoyi wà mwànà wa kambodyoto awu;

⁷⁵ Mwoyi Sungasunga wà Nzambi mmuswikila ku Izaleela. Yèyè ùdi nendè mu dibàkà. Netùkafikè ku cyòci aci mu tusunsa tukese emu, bu Mukalenge mwa kwanyisha. Yèyè ùdi mu dibàkà ne Izaleela. Mwoyi Wèndè mmuswikila kùdiye. Anu mùndi mēmè muswikila kùdi Mādamù Branham udi paanyimà pààpa wàwa, mukàjàanyi, ne mùdi wèwè muswikila kùdi webè mukàji amu. Mwoyi wèbè mmuvùngilamù. Ne Nzambi ùdi mu dibàkà ne Izaleela. Nenku civwa ncinyi? Yakòbò ùvwa mwambè ne: “Mwoyi wànyì mmuvùngila ne muswikila mu mwànà ewu. Nèngìkalè mwa . . .”

Nenku nebyènzekè ne, pààmònàye mwànà wa kambodyoto awu kàyi neetù to, . . .

Yòzefù ùvwa muswe kulama mwànà wa kambodyoto awu, nudi bamanyè's. Tudi bamanyè bwalu abu.

. . . ne yêyè neàfwe, mwine tatwëndè awu's, nenku basadidi bèèbè nebàbwejè nsukì ya mvya ya musadidi webè tatwétù awu ne kanyinganyinga ku lukità.

Tèèlejàayi dilòmba didi Luubènà ùlòmba mpindyewu adi.

Bwalu musadidi webè mmulwe cyeyà cya mwànà wa kambodyoto aku webè. . . kùdì taatù wanyì, pa kwamba ne: Mémè nciyi. . . mukutwàdìleyè to, dîbà adi nêmpetè kadyuwù kùdì taatù wanyì bwa kashidi.

Mpindyewu ki bwa cinyi, ndi nkulòmbakù, swàku bwa musadidi webè àshaalè yêyè pa kaaba kàà mwànà wa kambodyoto awu. . .

Kaa, ekelekele! Nwamònu's, mmwimàne anu kumpàlà kwa Yòzefù mene, mwanaabo awu. S'n'Yòzefù, kadi yêyè kàyi mumumanyè to. Kaa, indilà too ne pààbangà Bukalenge bwa bidimu cinunu abu, mwaneetu!

. . . mpindyewu pa kaaba kàà mwànà wa kambodyoto awu bu mupika wa mukalenge wanyì; . . .

Mutèèlèjaayaaku, mùdiye ùjikula ne, “mukalenge” amu.

. . . ne àlekelèku bwa mwànà wa kambodyoto awu àye ne bânà bààbò.

Bwalu mmunyi mungàaya kùdì taatù wanyì, mwànà wa kambodyoto awu kàyi naanyi? Bwa ku mpùùkàpùkà ncùkadi ngálwa kumòna bubì bùvwila taatù wanyì.

⁷⁶ Ûsengeleela, ùfila mwoyi wèndè yêyè mwine! Mushindu mwine wimanà beena Yudà abu mwaba awu ne byanza byolola's wè! Tàngilàayi. Tàngilàayi mpindyewu mvensà, wa 45 awu. . . Tèèlejàayi ne ntèmà, kacìnùpicikù to. “Pàvwà Yòzefù kàyi mwa. . .”

Dîbà adi Yòzefù kupangayè mwa. . . -dikànda— kudikànda kumpàlà kwa bônso bàvwà biimàne nendè abu; . . .

Mwaneetu, dîbà adi's ki dyàjikijiibwà mpekaatu's. Bupidyà nebùye mwamwamwa.

. . . ki kwelaye lubilà, ne kwambayè bwa muntu yònsò ùmukè. . . mwaba wùvwàye awu. Nenku kakwàkashàalakù muntu nansha umwe mwimàne pàmwe nendè to, pàvwà Yòzefù ùdìmanyisha kùdì bânà bààbò apu.

⁷⁷ Ncinyi aci? Nansha mukàjèndè sungasunga wàkaalukila mu nzubu wa bukalenge. Kaa, ekelekele! Mukàji-musèla mu Butùmbi, pààlukilà Yesu (Netùbwelèmu kaaba aka.) bwa kuDimanyisha.

Ki kwelaye cibòòbò wa mwadi, . . .

Yòzefù kààkapetakù kabidi mwa kudikànda to, ki kwelayè mukunda.

*...ne beena Èjjiipitù ne bàà mu nzubu wa Pâlò
bààkawùmvwa.*

⁷⁸ Too ne lwà mundekeelu menemene mwà nzubu wa bukalenge mwàmwa, kuumvwabò Yòzefù wèla mikunda. Mpindyewu, aci cìvwa ncifwànyikijilu cya Kilisto ùtwilangana ne beena Yudà, bwa ne, Yèyè mmumanye ne Yèyè nguwva mubàfofòmije bwa twètù twamòna mwa kupeta mpùngà. Kadi pààlwàYe cyàkàbìdì kùdìbò, mpekaatu wa Izaleela neàjikè.

*Ki Yòzefù kwambilayè bàna bàabò abu ne: Mmémè
Yòzefù!...*

Nudi nwela meeji ne Yesu neambè cinyi? “M’Mémè Maasiya wenù awu. M’Mémè unwàkapoopelà pa nkùrusè awu.”

*...taatù wanyì ùcìdì ne mwoyi anyi? Ki bàna
bàabò kupangabò ne mwa kumwandamuna, bwalu
bààkadyùmvwa batàcishùbwe kumpalà kwèndè.*

⁷⁹ Kaa, bikèngela ngùimanè kaaba aka bwa katanci kakese. Tùbuululàayi mu Zekàayi mu nshapita wa 12. Buulùlaayi pàmwè naanyi mpindyewu mu Mukàndà wà Zekàayi, nshapità wa 12 wa Zekàayi. Kadi ndi pàmwàpa ntamba kwangata dìbà dyàbùngì mu kuditwa mu diyiisha pa cyòcì eci, kadi ndi—ndi ntèkemena ne kì nnanku to. Ne ndi—ndi muswe nùcyùmvwè, njinga nanku ngamba kufwa.

⁸⁰ Zekàayi, twàngatàayi nshapità wa 12 wa Zekàayi, bwa tùmònè cyàmbàYe mpindyewu piìmanàYe kumpalà kwa bàna Bàabò. Zekàayi 12, ku wa 10 aku. “Kujikija mpekaatu,” mpindyewu. Eyo, nshapità wa 12 ku mvensà wa 10.

⁸¹ Mònaayi. Nenku yèyè ùdì wàkula mpindyewu bwa bààshààdìlè; dicìncimikiibwa dya Yèlusàlèmà; nyama wa lwonji ne bilwìlu abi mbyumùshùbwe, ne bikwabo; bintu byònsò mbifikè ku ndekeelu mpindyewu; mpabwìpi ne Bukalenge bwa bidimu cinunu apa, Bukalenge bwa bidimu cinunu pabwìpi ne kubanga mpindyewu mene.

*Nenku mémè nèngùcìkijè pa nzubu wa Davidi, ne pa
bisòmbèdì bya Yèlusàlèmà, nyuma wa (cinyi?) ngàsà...*

Amen! Ngàsà udi ukèmesha awu!

*...pa nzubu...bàdì basòmbèle mu Yèlusàlèmà,
("cimenga cya cijila" cya Danyèlè), nyuma wa ngàsà
ne wa misèngeleelu, ne bòbò nebàtangijè mèsù kùndì
mémè udibò batwè difùmà, ne nebàmudilè, mùdì muntu
ùdila mwanèndè umwèpelè wa balùme, ne nebàmudilè
mwadi wà bujindajinda, mùdì muntu ùdila bujindajinda
bwa mwanàabutè wèndè.*

⁸² Tèèlejàayi, madilu miine ìkalàku piìkalàYe mwimàne mwaba awu, mwikàle ùDìmanyisha kùdìbò, mwàkenzà Yòzefù amu! Tèèlejàayi.

Nenku *mu ditùkù adi nekwikalè madilu manene a menemene mu Yelusàlèma, byenzè bu madilu a Haadàd-*...

Ncyèna mumanye mwa kushindumuna dìnà adi to, H-a-a-d-à-àd-è-l-ì-m- -ò-...

...*Haadàdèlimònà mu... Meegidònà—Meegidònà.*

Ne mu ditùnga nemwikalè madilu, dîkù ne dîkù dyònsò pabule; dîkù dya nzubu wa Davidi pabule, ne bakàjì bààbò pabule; ne dîkù dya nzubu wa Natànà pabule, ne mèkù àbò pabule;

Ne... nzubu wa Lewi... ne bakàjì bààbò ne mèkù àbò pabule;... ne Simèònà ne bààbò pabule;

Ne mèkù ónsò àdì mashààle awu, dîkù ne dîkù dyònsò... ne bakàjì bààbò pabule.

⁸³ Nebàdyũmvwè bundu bikolè, piìmanàbo mwaba awu bà mòna ne Mwine uvwabò bapoopèle pa nkùrusè ne bavilè awu, mwimàne mwaba awu, s'ki Yòzefù wabò sungasunga wa mushinga mukole awu. Nekwènzekè madilu manene a menemene! Nenku nebàmbè ne: “Abi bibangu bya mpùtà Udi mubipetèle penyì?”

⁸⁴ KwambaYè ne: “Mu nzubu wa balunda Bàànyì.” Nudi numòna cìndi njinga kwamba anyì? Bwa kujikija mpekaatu, buyidiyà, ki cidìYe úvwila ncyoci aci.

⁸⁵ Nenku cidimu cya makumi mwandamutekètè cya Danyèlè eci, lumingu lwà makumi mwandamutekètè elu's wè, eyowa, ùlwà bwa kujikija mpekaatu, kuumumusha. Nudi bumvwè mpindyewu anyì? Cya kumpàlà ncinyì? “Kulekeesha dishipa dya mikenji.” “Kujikija mpekaatu.” Nombà mwisàtù: “Kwenza dipungisha bwa bubì.” Nwènù bàdi munkaci mwa kucifùnda abu.

Mvwa ne mikwabo Mifùndù mitwe ku yisambombo mwaba awu, kadi ndi anu nyitùpika, bwalu kùdi luuyà lukolè. Katwèna baswe kwangata dìbà dipitèpìte búngì to. Ndi muswe kubifila búngì anu búndi mwa kufilaku abu, kadi kì nkunùlama ntàntà mupitèpìte bule to. Eyo.

⁸⁶ “Kwenza dipungisha bwa bubì.” *Bubì* “nkwenza kwa cilèma,” mwàkenzàbo ku nkùrusè amu. Yèyè wàkenza dipungisha, kadi kadyàkwangaciibwa bwàbò bòbò to. Kadyàkangaciibwa bwàbò bòbò to. Bwa cinyì? Bwalu bàvwa bafofomija ne kabàyi mwa kucimòna to. Kadi bààkafofomijiibwa bwa cinyì?

Wèwè udi wamba ne: “Ee, pàmwàpà, leelu ewu... bwalu mèmè ndi mpofo.” Wèwè udi mpofo nku budiswìle. Bòbò bàvwa mpofo mbwalu Nzambi ngwàkabàfofomija. Kadi wèwè udi mpofo bwalu udi mpofo ku budiswìle bwebe. Kakwèna dipungisha bwebe wèwè to. “Nwènù kanùyì nwi tabuuja ne Ndi

Yèyè to,” mwàkambà Yesu, “nenùfwe mu mpekaatu wenù.” Aci’s ncyà bushuwa.

⁸⁷ Mpindyewu twàlukilàayi cyàkàbìdì mu Zekàayi, nshapità wa 13. Mpindyewu tuteelejàayi kaaba aka. “Kwenza dipungisha.” Mpindyewu, mwaba wùdì eci...Mvwa nkèba muntu kampànda, àteelejè eci—àteelejè eci, pàmwàpa Mukalenge neàcìvwijè mushindu kampànda.

Mu ditùkù adi nekwikalè . . .

⁸⁸ “Mu ditùkù adi.” Docteur Scofield mmutèèke mu mèyi èndè a kwinshi kwa dibèji emu, anyì mu mitù ya tusaka twèndè emu ne: “Bàshààdìlè . . .Bàshààdìlè bàvwà ne kanyinganyinga bàakafùnkuna ku nkùrusè.”

⁸⁹ “Bwa kwenza dipungisha bwa bubì.” *Bubì*, “ncintu cyùdì mwenzè mu mushindu mubì, cyùvwà mumanye bimpè menemene, cìvwà kaciyi cìkèngela bwa wèwè kwikala mwenzè to.” “Mémè mulongòlòle bubì munda mwa mwoyi wànyì, Nzambi kàakuntèelejilakù to.”

⁹⁰ Mpindyewu, mu Zekàayi nshapita wa 13, túbàngilàayi ku mvnsà wa kumpàla—ku wa kumpàla.

Mu ditùkù adi nekwikalè mpokolo mukàngula mu nzubu wa Davidi ne bwa bàdì basòmbèle mu Yèlusàlèmà bwa mpekaatu ne . . . bwa bukooyà.

⁹¹ Nekwikalè nzubu muunzulula. Tùtungunukàayi; tudi bafwànyine anu kucibala too ne kwinshi. Ndi muswe bwa nùcìfùndaayi bwa nwcibala. Kadi mpindyewu, mémè ndi mucyènzè kaacimanyinu kaaba aka bwa kubangila ku mvnsà mwi6 kadi kubala too ne ku wa 10. Eyo, túbalàayaaku mpindyewu bwa kumòna, to, kubala too ne ku wa 9’s wè.

Ne muntu neàmukonkè ne, aci nkewèpì . . .Eyi mmpùtá kaayi mu cyanza cyebe aci? Dibà adi yèyè neàndamunè ne: Yóyi ayi . . .nyìndì mupetè yìvwà . . .(Tùmonèbi) . . . neàndamunè ne: Nyìdìbo bantàpe mu nzubu wa balunda bàànyì.

Juukà, Éyi mwele wà mvità, ùtapè mulami wa mikooko, ne ùtapè muntu udi mwena dyànyì awu, mùdì MUKALENGE wa cìwìlu wàmba, tàpa mulami wa mikooko, nenku mikooko neyítangalakè, nenku mémè nènkuDIMWINÈ cyanza cyànyì kùdì bàà bakese abu.

⁹² Mpindyewu, Yesu ngwàkatèèla Mufùndù awu. Mònaayi: “Tàpa Mulami wa mikooko, ne tàngàljà mikooko.” Kadi mònaayi kasaka kàdì kàlondà aku. Yèyè wàkakàtèèla anu too ne mwaba awu. Kadi tàngilàayi cidì cyambilu cyàkù cidì cilondà aci cyàmba, citùpà cyàkù cidì cilondà aci. “Nenku NènkuDIMWINÈ cyanza Cyànyì kùdì bàà bakese abu.” Cinyì? Kasùmbù kàà Benyàminà kàdì munkaci mwa kujuuka mpindyewu aku. “NènkuDIMWINÈ cyanza Cyànyì kùdì bàà bakese.”

93 “Tàpa Mulami wa mikooko.” Izaleela, dyàmbedi, Izaleela wàkatàpa Mulami wa mikooko, kutangalajayè mikooko too ne pa buloba bujima. Kadi Nzambi mmwambe ne: “Nênkudimunè cyanza Cyànyì, bwa kwangata bânà bakese abu ku ditùkù dya ndekeelu.” Dìbà kaayi? Pìikalà dipungisha bwa bubì dyenjìbwè.

94 Izaleela neàsungidiibwè, yònsò wa kùdìbo. Tùbuululàayi mu Yeshàayi. Yeshàayi, nshapità wa 66 wa Yeshàayi, bwa kubala anu katanci kakese cyanàànà. Nenukù tùmònàayi cidì Nzambi wàmba mùdì Izaleela ùsùngidiibwa, ntàntà wìkalaci mwa kwangata bwa kusùngila Izaleela. Tàngilàayi nùmònè mwàlwàcì ne lukasa lwònsò. Mu Yeshàayi, nshapità wa 66 ku mvensà wa 8. Wèwè muswe kucìbala cyònsò, mbìmpè.

*Nganyi ukààdikù muumvwè cintu bu nanku?
nganyi ukààdikù mumòne cintu bu nanku? Buloba
nebwènjiibwè ne kulela...mu ditùkù dimwe...
mu ditùkù dimwe anyi? ...bwalu pàdì anu Sionà
ùdinyènga bwa kulela, yèyè kulela bânà bèndè.*

95 Sionà mmwenzè anu ùmòna ne ùvwa m'Maasiyà wabò, kulediibwayè cyàkàbidì, mu ditùkù dimwe. “Kwenzà dipungisha bwa mpekaatu, ne kwenzà dipungisha bwa bubì, bukooyà.” Kaa, ekelekele! Bàvwa benzè cìvwà cibì, cìvwà cilèma. Dipungisha dyàkenjiibwa bwa bubì bwàbò.

96 Nombà mwinâyi. “Bwa kubweja bwakànè bwa kashidi.” Aci ki cintu ciinâyi cyàkavwilàYe. Ciinâyi, cyàkavwilàYe bwa kwenzà. “Bwa—bwa kubweja bwakànè bwa kashidi.” “Kujikija mpekaatu; dipungisha; ne kubweja bwakànè bwa kashidi.” Pààkajikà dishipa dya mikenji dya Izaleela...Pàvwà dishipa dya mikenji dya Izaleela... .

97 Mpindyewu netwikalè mwa...Ndi muswe bwa nùbakulè eci, bwalu patwàtwàlà mukàjì awu, ne dragon awu wipaciibwa, nenwàlukilè cyàkàbidì buludì ku Mufùndù wumwewumwe ewu. Ikàlaayi batwishìibwè ne nudi baWùfunde. Pààjikà dishipa dya mikenji dya Izaleela, Sàtaanà, yèyè udi mubàfùndì wabò bòbò ne mutùfùndì wetù twètù, Sàtaanà neàswikiibwè mu bwinà bùdì kabùyi ne cishìikidilu. Dìbà kaayi? Dìbà dya kubweja bwakànè bwa kashidi, cintu kampànda cidì kacìyi mwa kwikala ne ndekeelu to, cyònsò cìvwà cìtwàlà bubì aci necyùmushiibwè.

98 Twàngatàayi Bwàkabuulwibwà nshapità wa 20 ku mvensà wa 13, katanci kakese cyanàànà, ne túbalàayi kaaba aka katanci kakese cyanàànà. Bwàkabuulwibwà 20, ku 13... To, mfwilaayikù luse. Bwàkabuulwibwà...1 too ne ku 3, eyowa. Ncìvwa mumòne kaacimanyinu kakese munkacì mwàcì aku to. Bisùululù mwab'ewu bìdì bìmbwela mu mèsù. Bwàkabuulwibwà nshapità wa 20, nenku tùmònàayi.

*Nenku mèmè kumòna mwanjelo ùpweka ùfùmina mu
dyulu, mwikàle ne nsapì ya ku bwinà bùdì kabùyi ne
cishìikidilu ne munyòlòlò munene mu cyanza.*

...wàkawkàta dragon, nyòka wa kale awu, udi dyabùlù, ne Sàtaanà, ne wàkamuswìka bwa bidimu cinunu,

Ne wàkamukùpa mu bwinà bùdì kabùyì ne cishìikidìlu, ne wàkamukàngìlamu, ne wàkamutwà citampì, bwa kàyìkù ne cya kuseeswìsha kabidì ditungà to, too ne pàvwà bidimu cinunu ne cya kuula; ne paanyimà pàà cyòci aci... ùvwa ne cya kusùludiibwa bwa citupà cìpì.

⁹⁹ Kwenza... bwa kashidi. “Kubweja bwakànè bwa kashidi,” Sàtaanà mu bwinà bùdì kabùyì ne cishìikidìlu. Nenku pàdìYe wènza aci, ùdi ùtwa dyabùlù citampì yèyè ùvwa useeswìsha bantu awu.

¹⁰⁰ Mpindyewu twàlukilàayi mu Habàkùkà, nshapità mwi2. Habàkùkà, nshapità mwi2. Ne mpindyewu netwìkalè mwa kumòna bwa cinyì Wàkatwà nyòka wa kale ewu citampì, ne bwa cinyì cyòci aci cyàkenjiibwa, ne ncinyì cidì cyènzekà dyàkàmwe paanyima pàà yèyè mutwìbwe citampì. Mémè ndi munange cyòci eci, kadi nwènù? Cidì—cidì cikatùfikisha ku dimanya dya cintu kampànda. Habàkùkà, Habàkùkà, nshapità mwi2 ku mvnsà wa 14, ngeela meeji ncyòci, ndi muswe kubala. Pàdì cyòci eci cyènzeka... Tàngilàayi.

Bwalu buloba nebùlè tètè ne dimanya ne butumbi bwa MUKALENGE, anu mùdì mâyì àbwikila mbù.

¹⁰¹ *Brrrrr!* Ekelekele! *Yoyòyò!* Mu ngaakwilù mukwabo, pàdì mwena lukunà ùmana kuumushiibwa, ndekeelu wa mpekaatu wàfikì, dibweja dya bwakànè bwa kashidi dyàfikì, Sàtaanà mmutwìla citampì mu bwinà bùdì kabùyì ne cishìikidìlu, ne dimanya dya Mukalenge nedìbwikilè buloba anu mùdì mâyì àbwikila mbù amu. Amen! Butumbi kùdì Nzambi’s wè! Cìlwalwa, mwaneetu, cìlwalwa! Bakàjì nebìikalè bainàbànza, ne balùme nebìikalè bantu bàà bukàlàngà. Amen!

Pùulà dimanya dya Mukalenge pa buloba ne pa mbù ne mu dyulu;

Nenku, kaa, mwoyi wànyì wùdì wùtwa mikèmu, wùdila bwa ditùkù dya diikisha dya kalolo adi,

Pàalukilà cyàkàbidì Yesu wetù pa buloba.

¹⁰² Amen! Eyo. Mpindyewu, dìbà adi Bukalenge bwa bidimu cinunu bwàbangì. Dìbà adi ki diikalà Bukalenge bwa bidimu cinunu, diikalà Cimenga aci ne cya kwibakiibwa. Cìnàyì... Ndi ne mikwabo Mifùndù mitwè ku yisambombo, kadi netùlwijakajè. Mpindyewu, patwàlukilà, nêngàngatè mikwabo Mifùndù eyi; kadi bidì bìnùpèèsha anu cingènyingenyi cyanàànà cya byònsò.

103 Nombà mwitânù. “Bwa kutwà citampì ku cikèènà-kumòna ne cipròfetà.” Nwamònu’s, Mwanjelo awu wàkalwa bwa kutwà citampì ku cikèènà-kumòna ne cipròfetà.

Ndi—ndi ngumvwa bibi bwa kwamba eci. Kadi, mufùndi munene kampànda, ùmvwà mbala bàmba ditùkù adi, pìikalàbi ne kàvwa mubwejàkàje aci’s! Mmwambe ne “Civwàci . . .”

Mpindyewu, anu bwa kuleeja mùdi dikùtàkana . . . Kaa, mfwilaayikù luse. Ncyèna ne meeji a kwamba nanku to. Nùmfwilaayikù luse. Kì ncìndi muswe kwamba to. Ncya bushuwa ne kí ncìmvwà muswe kwamba to. To. Muntu kàyikù ne—ne—ne dilaabiibwa to, nwamònu’s,

Muntu awu mmwambe ne: “S’nudi numòna kaaba aka ne bikèènà-kumòna ne cipròfetà bivwa byanyishila misangu yònsò anu ekeleeziya wa beena Yudà.” Kì yèyè ne: “Kubangila anu cikondo cya Danyèlè, pààkalwà Danyèlè apu, cìvwa cyùmvwija ne kabàvwa kabidi mwa kupeta cikèènà-kumòna anyì cipròfetà to.” Yèyè ne: “Bintu byònsò bìdìbo bàmba leelu ewu, bya òmòna dya bikèènà-kumòna ne cipròfetà ebi, byònsò abi bivwà ncintu cya dyabùlù,” ne, “cintu pààci ne mbikèènà-kumòna ne biprofeta kabìvwakù to.”

Mwaneetu, s’kwàkalwa bapròfetà makumi paanyimà pàa Danyèlè. Ne kùvwa Yone Mubàtiji. Kùvwa Yesu Kilisto. Kùvwa bapròfetà mu Dipungila Dipyadiya dijimà. Kùvwa bikèènà-kumòna. Kùvwa Banjelo.

Nansha twamba mwine mmunyi mùdi muntu wetù ewu mwa kwamba nanku awu? Kadi, nudi numòna’s, aci’s ncya meeji a budìsu, bwa kuteeta bwa kufinyika cintu mu mitu ya bantu, bwa kucìvwija kaadilongesha kàa ekeleeziya, anyì kaacintu kakese kàa lukutukutu, bwa kushàalakù bulelèlà kùdi bantu. Ne bantu abu bòbò kabàyi ne Nyuma Mwìmpè to, nebàseeswishibwè kùdi kaacintu aku.

104 Mpindyewu, katwàngaci cìdi muntu kampànda mwambe to. Mpindyewu, kakwèna Mufùndù bwa kujaadika ciine aci nansha. Pa nanku mmunyi mùndìku mufwànyine kwangata ciine aci? Ee, tujandulàayi cìdi bulelèlà ditwà dya citampì. Tàngilàayi! Yèyè wàkalwa bwa kwenza cyòci aci, bwa kutwà citampì ku cikèènà-kumòna ne ku cipròfetà.

105 Mpindyewu, twànjàayi kwalukila buludì ku Mukàndà wà Danyèlè, mutùvwà amu. Mu Mukàndà wà Danyèlè amu, netùpetè anu cìdiYè mwambe. Mpindyewu tùbuululàayi mu Danyèlè nshapità wa 12. Mpindyewu, patùdi tuya mu Danyèlè 12 apa, mpindyewu, tudi mwa kubanga. Nenku tùbalàayi kubangila ku . . . Panwikalà baalùkile kumbèlu, ndi muswe bwa nùbalè kuumukila ku mvensà wa kumpàla kutùngunuka. Tùbalàayi anu kubangila ku mvensà wa kumpàla, kupweka too ne ku mwì4.

Nenku diine dîbà adi Mikàèlè neàjuukè...mfumu munene wikala mwa kujuuka bwa bânà bâa cisâmbâ cyebe;...

Mpindyewu, eci nku cikondo cya nshîikidilu.

...ne nekwikalè cikondo cya ndululu, cya kacya... ditungà...

Apu mpââpâtukâ mufwilakanyi ne Kilisto, mubândi wa pa kabalû wa Citampî cya Kumpâla ewu, pââbwelâye mu cyalu.

...mene too ne ku cikondo eci;...

Kî mmu cikondo cîvwâ Tiitò mukwâte bimanu bya Yêlusâlêmâ aci to. Aci cîvwa anu mu mwaba wumwepele cyanânâ. Tangilâayi pâdi mufwilakanyi ne Kilisto ewu, mfumu uvwa ne cya kulwa awu, tângilâayi pâdiye ûlwa.

...mene too ne pa cikondo cimwecimwe aci, ne mu cikondo aci cisâmbâ cyebe necisungidiibwè, yônsò udi usanganyiibwa mufûnda mu mukândâ awu.

Aleluuyah! “Cisâmbâ cyebe,” Izaleela, “neâfundiiibwè mu mukândâ.”

Ne bâbûngî bàà kù aba bàdi balâale tulù mu lupwishî lwa buloba nebâbiikè, bâmwe bwa mwoyi wâ kashidi, ne bakwabo bwa bundù ne dipeetudiibwa dya kashidi.

¹⁰⁶ Nansha twamba mwine mmunyi mùvwâbi bifwânyîne kwikala pâvwâ Tiitò mukwâte bimanu bya Yêlusâlêmâ? Bîvwa bifwânyîne kwikala nanku munyi? Kabîvwakù mwa kwikala nanku to. Nwamônus, yêyè ûdi wâkula bwa cikondo cya nshîikidilu, ku dibîikâ dya ku lufù. Neya bushuwa anyi? Mpindyewu:

Nenku aba bàdi ne lungenyi nebâkenkè bu dibâlakana dya dyulu, ne aba bàakûdimunâ...aba bàakûdimunâ bââbûngî kubâtûma ku bwakâne...bu mitooto bwa kashidi...

Tèelejàayi! Ditwâ dya citampî dya cya bushuwa, dilelèlâ, ki dyôdi edi.

Kadi wêwè, Éyi Danyèlè, bwikîla mèyi awu, ne twâ citampî ku mukândâ awu, too ne ku cikondo cya nshîikidilu;...

¹⁰⁷ Ncinyî aci? Kaa, aleluuyah! Nudi nucimòna anyi, nwênù kâlaasâ? Dibuuludiibwa dya Yesu Kilisto edi, ne dya Bukolè Bwèndè, dya Dilwa Dyèndè, dya cikondo cya nshîikidilu, òvwa ditwîbwe citampî too ne ku cikondo eci. Ki cîvwâYe mulwe kwenza ncyôci aci. Ncisokoka bamanyi bââ mabâla; kî mbya bikêmesha to mùdîbo baswè kwangata, “dicîtwa dya citampî,” kale wâwa, bu ne “kakwèna baprôfetâ,” ne bikwabo byônsò mu cikondo cya kale. Kacyâkwikalakù ne pââ kucijaadikila to. Kadi cikèenâ-kumòna, cikèenâ-kumòna eci, cyâkatwîbwa citampî too

ne mpindyewu mene mwab'ewu. Nenku ki pòpò apu pândi mêmè ntèeka dyànyì diitabuuja, bwa ne Nzambi neàbuululè mbingu makumi mwandamutekète ayi. Amen! “Citwè citampì,” mwàkambàYe, “too ne ku cikondo cya nshìikidilu. Kànga Méyì awu ne twà citampì ku Mukàndà awu too ne ku cikondo cya nshìikidilu.”

¹⁰⁸ Cyàkenzàye ncinyì? Kutwà citampì ku cikèènà-kumòna ne ku cipròfetà! Danyèlè nguvwa mwambe cipròfetà bwa bintu ebi. Ûvwa mubimòne mu cikèènà-kumòna, ki Mwanjelo kupweka bwa kutwà citampì ku cikèènà-kumòna aci, ne kutwà citampì ku cipròfetà. Bòbò bàdi mwa kucibala, kadi kabàyi mwa kucyùmvwà to, too ne ku cikondo cya nshìikidilu. Cikondo ya nshìikidilu, cikondo cya nshìikidilu ncinyì? Ndekeelu wa lumingu lwà makumi mwandamutekète, pìikala mfumu awu, mufwilakanyi ne Kilisto awu, pàabuuludiibwàye, mu cikondo eci, ùdivwiya yèyè mwine Nzambi. Mmuniyì mutùdi tumanya ne cyòci eci nciwà citampì too ne ku cikondo eci? Danyèlè wáfumu ku dijikija; ewu nnshapità wa ndekeelu wa Danyèlè.

¹⁰⁹ Mwaneetu wa bakàjì Simpson mmungambile mu mapingaja emu, wàmba ne: “Mwaneetu Branham, mêmè ndi mubale Mukàndà mujimà wà Danyèlè. Nciwvakù—nciwvakù ne cimvwà mumanye pàngàajikìjì, cipite pâmvwà mubangè apu to.” S'ki cyòci eci, Mwaneetu wa bakàjì Simpson, pawikalà kaaba aka dilòlò edi. Ngeela meeji ne ndi mumumòne musòmbè mwaba wàwa. Ncyàkambakù bwalu nansha bumwe mu ditempu dya màshinyì amu to. Mvwa anu mupùwe, bwalu mvwa mwele meeji ne pàmwàpa nèmfikèku.

Kadi, cikèènà-kumòna ciwà Danyèlè mumòne, kumpengà kwa musulu kwàka aci, cyàkatwibwa citampì, “too ne ku cikondo cya nshìikidilu.” Cidi... Ngánjì anu kucibala kaaba aka. Nwamònu anyì?

Kadi wèwè, Éyì Danyèlè, bwikilà méyì awu, ne twà citampì ku mukàndà awu, too ne ku cikondo cya nshìikidilu; bààbùngì nebànyeemakanè bààtwa eku bààtwa eku, ne dimanya nedivulanganè.

Nenku mêmè Danyèlè ngàkatàngila, ne, mònaayi, kùvwa kwimàne...babidi,...umwe ku luseke lumwe...lwà musùlù, ne mukwabo ku mukwabo mwelelu wà musùlù.

Nenku umwe wàkambila muntu uvwa muvwàle bilàmbà bya—bya linà, uvwa pa màyì a musùlù awu ne: Nebinengè ntántà bule kaayi too ne kundekeelu kwa maalu a kukèma aa?

Tèelejààyaaku mpindyewu.

Ki mêmè kuumvwa muntu uvwa muvwàle bilàmbà bya linà, uvwa pa màyì a musùlù awu, pàakabàndishàye cyanza cyèndè cya dyàbalùme ne cyanza cyèndè cya

dyàbakàjì muulu bitàngija mu dyulu, ne kudicìpayè kùdi ewu udi ne mwoyi bwa kashidi ne kashidi awu ne nebùikalè bwa cikondo, cikondo, ne cyàbibìdì cimwe cya cikondo; . . .

Mpindyewu, nyewu tumùfika anu—anu menemene ne: “Cikondo, cikondo, ne cyàbibìdì cimwe cya cikondo.” Mpindyewu nùtangilàayi patwàbwelà mu mbingu makumi mwandamutekètè ya Danyèlè, mùdì cyòcì aci cidizòla. Ki pàabuuludiibwà bwalu-busokoka abu. Eyo. “Cikondo, cikondo, ne cyàbibìdì cimwe cya cikondo.”

. . . ne pùikalàye. . . (“yéyè,” mupinganyi muleeji muntu mpindyewu, mufwilakanyi ne Kilisto awu) . . . mukùmbaj- . . . mukùmbàje mukùmbàje bwa kutangalaja bukolè bwa cisàmbà cya cijila, (ki pàashipàye cipungidi cyèndè munkacì mwa lumingu mpòpò apu), bintu byònsò ebi nebùikalè byùle. (Amen.)

Nenku ngàkatèèleja, kadi ncyàkuumvwa to: pashùsbe ngàkamba ne: Èyì. . . Mukalenge, ndekeelu wa bintu ebi neikalè cinyi?

Nenku yéyè wàkamba ne: Ndàaku kwebe kúyaaya, Danyèlè, bwalu mèyi aa mmakànga ne matwà citampi too ne ku cikondo cya. . . [Disangisha dîdì dyàmba ne: “Nshùkidilu.”—Muf.]

Kaa, kanùpukù aci mwoyi to!

too ne ku cikondo cya nshùkidilu.

Bàabúngì nebàkezudiibwè, ne nebàtòokeshiibwè, ne nebàteeciibwè; kadi beena lwonji nebènzè maalu ne lwonji, ne nansha umwe wa ku beena lwonji kàakuumvwa nansha; kadi bàdì ne meeji nebùmvwè.

¹¹⁰ Mukenji wa cikondo cya nshùkidilu ngwàcibuululà; cikondo cya ndekeelu cya ekeleeziya. Butùmbi’s wè! Yoyòyò! Ki bwalu mbwòbù abu’s! Kaa, ekelekele! Cidi cintùtula, pàndì ngeelakù meeji, bwalu-busokoka abu! Bintu bìdì bantu bàà bukwàèkèleeziyà bàbwitapù kwìsù, bàmba ne: “Mbya macimbu” abi. Bwalu-busokoka bwa ne Yesu Kilisto ùvwa Nganyi; kàyi Mupersona mwisàtu, kàyi Mupersona mwibìdì, kàyi Mupersona mwisàtù to, kadi Mupersona awu wa Nzambi. Maalu-masokoka makwabo ónsò a Nzambi aa neàbuludiibwè, bwalu mbifùndiibwe kaaba aka mu Mukàndà ewu, ne nebàbibuulwilè lukòngò lwà cikondo cya nshùkidilu. Kabèèna mwa kubimòna mu maasèminèrè, ne mu bilongelu, ne mu màngumba to, anu mùdì beena Yudà kabàyi bafwànyine kumòna ne Yesu ùdì Maasiyà to. Kabyèna bikèmesha to pàdìbo bàteeta kwela meeji ne nwènù nudi bapàle. Kabyèna bikèmesha to pàdìbo bèèla meeji ne nudi bakùtākàne. Kabyèna bikèmesha to pàdìbo kabàyi mwa kuumvwa bwa cinyi nwènù kanwèna nwenza cyokò-cyokò pàmwè naabo to. Mbwalu, kùdi

Bukolè ne cikèènà-kumòna byènda bicilonda, Diyì dya Nzambi didi dibuulüdiibwe, bwa kutèeka Ekeleeziya mu bulongame bwa Dyambwibwa ne diya dya Kumbèlu. Eyowa. “Bààbûngì nebànyeemakanè bàkatwà eku bàkatwà eku, ne dimanya nedivulanganè.” Cya bushuwa.

¹¹¹ Mpindyewu, cikwabo cintu cidi cifwànyine kumanyika ncinyi? Tàngilàayi maèkèleeziyà leelu ewu., S’ncyôci eci. Ndi ntèkemena ne kacyèna citàpa ku mwoyi to, kadi bikèngela ncyàmbè. Kwenza . . .

¹¹² Mu ditùkù adi nekùjuukè mufwilakanyi ne Kilisto.

¹¹³ Mpindyewu, vùlukàayi ne, patwàbwelà mu Bitampì, mufwilakanyi ne Kilisto awu üdi ùpàtuka buludì mubànde pa kabalù mu Bitampì abi. Danyèlè mmucyàmbè kaaba aka ne: “Mfumu uvwa mwa kulwa awu.” Üvwa mwa kukòshiiibwa, Yesu, bwa kwenza dipungisha bwa cisàmbà. Kadi: “Mfumu üvwa mwa kujuuka, uvwa mwa kujuula cinyangu bwa kufila kabütù awu,” üvwa n’Loomò, ku Tiitò. Kadi ewu musangu, mfumu wapàtukila mu Loomò, ngwacyèna. Ne yèyè neàbuuludiibwè ku ditùkù dya ndekeelu, tèelejàayi mpindyewu, “üdivwija yèyè mwine Nzambi,” mùdì Nyuma Mwîmpè ütùdimwija mu Teesàlònìkà Mwibìdi, mwi2.

Twànjàayi anu kuyakù, Teesàlònìkà Mwibìdi, nenku dîbà adi kabyàkukèngela bwa nwènu kwangata dîyì dyànyì mémè to kadi Diyì dya Nzambi. Teesàlònìkà Mwibìdi, nshapità mwi2 ku mvensà wa 12. Tùmonèbi. Teesàlònìkà Mwibìdi, nshapità mwi2 ku mvensà wa 12. Tùmonèbi. Tùbangilàayi lwà kumutù kwa cyôci aci aku, ku mvensà wà 7.

Bwalu bwalu-busokoka bwa bubì bùkaadi bùkwàta mudimu; . . .

(Udi wakula ewu m’Pòlò, ku Nyuma Mwîmpè). . .

kadi—kadi yèyè udi ukànda mpindyewu awu àlekelè, too ne pùùmushiiibwàye mu njila.

“Yèyè” awu nganyì kaaba aka? Kùdikù muntu udi mumanye anyi? Nyuma Mwîmpè: “Yèyè udi ukànda” awu.

Nenku pashìshe (dîbà) dyàbuuludiibà Mwena lwonji awu, . . .

Dîbà kaayi adi? Anu dîbà diikalà Nyuma Mwîmpè mwa kuumushiiibwà adi, udi pabwîpi ne kuumuka mpindyewu mene awu. CidiYe ùmukila ncinyi? Üdi wàngata Ekeleeziya üya Nendè. “Mubuulüdiibwe!” Pòlò ngudi wakula, ku disonsodiibwa.

. . . wîkala Mukalenge mwa kwosha ne nyuma wa mukana mwèndè, ne wabùtulayè ku dibàlakana dya dilwa dyèndè; (mwena lwonji awu’s, mu bushuwa bwa bwalu)

*Yèyè mene, mwena dilwa didi bilondëshile bwenzeji
bwa Sataana pàmwè ne bukolè bwònsò ne bimanyinu ne
maalu a kukèma a mashimi,*

“Twètù ki bàdi ekeleeziya wa mutàmbe bunene. Twètù ki bàdi ne *bikampànda*. Twètù ki bàdi ne *bikampànda*. Dyènzàayi bònsò cimùkù,” nwamònu’s. “Twètù ki bàdi batàmbe bunene.” Maalu a kukèma a mashimi!

*Pàmwè ne byònsò. . . bya bubì mu aba bàdi bàbùtuka,
bwalu kî mbaakidile dinanga dya bulelèla to, bwa
bàamòna mwa kusungidiubwa.*

*Ne bwa bwalu ebu Nzambi mmubàtùmìne
miitabuuja makole a mafi, bwa kwitabuujabò mashimi
kwitabuujabò mashimi,*

*Ne bwa bóbò. . . bàdi kabàyi biitabùuje bulelèla
bàpiishiubwè, kadi biikàle ne bisànkansanka mu bubì.*

¹¹⁴ Nudi bacyūmvwè anyi? Kaa, ekelekele! Mpindyewu, Pòlò ngudi wakula ewu. Cikondo cidi Citampì cya Nzambi munkaci mwa kumanyishiibwa, Nyuma Wendè, Dìna Dyèndè, ngàsà Wendè, maalu masokoka makwabo ónsò àdi munkaci mwa kupàtuka mpindyewu aa, ndongamu eyi bwa Ekeleeziya Wendè bwa kuya mu Dyambwibwa; diicikijiibwa dya Nyuma Mwîmpè ndìdi dyenzè cyòci eci. Ki cidiYe mwenze mu matùkù a ndekeelu.

¹¹⁵ Mpindyewu, tùmónààyibì. Tudikù ne dìbà bwa cya ndekeelu eci anyi? [Disangisha didi dyàmbe ne: “Amen.”—Muf.] Ciisambombo: “Kwela maanyi pa Mutàmbe kutùmbuka.” Kaa, ekelekele! Ki cyòci eci! Cintu cya ndekeelu cidiYe ne cya kwenza, nkwenza cinyi? Mpindyewu, twánjàayi kwalukila mu Danyèlè, tujandulè byònsò bidìYe ne cya kwenza mwab’ewu mene. “Mbingu makumi mwandamutekète.” Ncinyi cidi ne bwa kukumbajiibwa mu cyòci cikondo eci? Eyo.

*. . . mmikòsela cisàmbà cyebe ne . . . cimenga cyebe cya
cijila, bwa kulekeesha dishipa dya mikenji (dishipa dya
mikenji dya cisàmbà), . . . bwa kujikija mpekaatu (bwa
cisàmbà), ne bwa kwenza dipungisha bwa bubì bwabo.
ne kubweja bwakànè bwa kashidi (bwa beena Yudà), ne
kutwà citampì ku cikèènà-kumòna ne cipròfètà (too ne
ku cikondo cya nshìikidilu), ne kwela Mutàmbe cijila
maanyi.*

Ki twipàcilà tusambombo twa dilwa Dyèndè ntwòtò atu.

¹¹⁶ Mpindyewu, “kwela Mutàmbe cijila maanyi.” Mpindyewu, eci cidi mwa kwikala cya pabwàci ndambu bwa katanci kakese cyanàànà, bwa bààbùngì bàà kunùdi nwènù balongeshi, kadi mpindyewu cilamàayi anu bwa katanci kakese cyanàànà, nùmónàayi anu mùdici cipàtuka.

¹¹⁷ Eci ndyela dya maanyi, kadiyi dya muntu to. Yesu ùkaadi mumana kwela maanyi. Mmwòmò anyi? Mukàndà wà Byenzedi

mmwambe ne Nzambi wàkeela Yesu maanyi a Nyuma Mwîmpè; Wàkaya myaba yònsò wènda wènta maalu mîmpè, ne wòndopa babèèdì, ne bikwabo. Yesu mmumana kwela maanyi, kujikè. Yèyè ùdì Maasiyà. Ne *Maasiyà* mbwena kwamba ne “Mwela maanyi.” Ncya bushuwa anyi? Kadi ku cikondo cya nshiikidilu eci, Yèyè ùdì ne cya kwela Mutàmbe cijila maanyi.

¹¹⁸ “Mutàmbe cijila” ncinyi? Ku wanyi pàanyi mushindu wà dicimòna, wùndì ngeela meeji ne ndi mwa kuciijaadika ku Mifùndù, nkwele “Mutàmbe cijila” maanyi, wikalà Ntentà wikalà mwa kukwàciibwa nendè mudimu mu Bukalenge bwa bidimu cinunu. Mpindyewu tèelejàayi, mònaayi bwa cinyi ndi ncyàngata. Cyumvwija mu—mu Yèheezèkèlè, mu nshapità mwi4, cidì . . . To, ndi muswe kwamba nshapità wa 43, mvensà wa kumpàla ne mwi6. Twàlukilàayaaku mu Yèheezèkèlè bwa tujandulè mùdiye ùcileeya mu cimfwanyi mu Bukalenge bwa bidimu cinunu, mwelàbo maanyi pa . . . Yèheezèkèlè 43, nenku túbalàayi anu ndambu cyanààna kaaba aka mpindyewu bwa tùmone ciikalàYe mwa kwenza mu Bukalenge bwa bidimu cinunu, dyela dya maanyi. Mu Yèheezèkèlè 43, eyo, nenku mpindyewu túbangàayi ne mvensà wa kumpàla, too ne ku mwi6. Nudi mwa kubalàayi cintu cyònsò mu kaabujimà paanyimà pàà bamanè kwalukila kumbèlu, mu bushuwa bwa bwalu, nwènù bàdì bàfùnda abu, Yèheezèkèlè 43. “Paanyimà . . .”

¹¹⁹ Mpindyewu, tàngilàayi, dyumvwija dya mushindu wà Ntempelu wikalà ne cya kwibakiibwa mu Bukalenge bwa bidimu cinunu. Mpindyewu, muntu kanà yonsò, mubadi kanà yònsò udi mumanye ewu, ne kuumukila ku Yèheezèkèlè nshapità wa 40, too ne ku nshapità wa 44, kî ncîngà cintu to ng’anu Ntempelu wa mu Bukalenge bwa bidimu cinunu udi wibakiibwa pa buloba, (muntu kanà yònsò mmumanye aci, nwamonu’s), pààmujà butumbi bwa Mukalenge, ne bikwabo byònsò mushindu awu. Mpindyewu tudi . . . netwikalè anu mwa kuumvwija mushindu wà Ntempelu awu mu nshapità wa 43, ku mvensà wa kumpàla too ne ku mwi6.

Paanyimà *yèyè kuya naanyi ku ciibi cya cimenga, ciibi mene ciwà* citàngile ku esètè.

Nenku, mònaayi, butumbi bwa . . . Nzambi wa Izaleela bwàkalwa búfùmina ku njila wa ku esètè, ne díyi dívwa difwànàngàne ne díyi dya máyi àbùngi, ne buloba bwàkakenkeshiibwa ne bukènkè abu.

Ne bivwa bilondèshile mmwènekeli wa cikèènà-kumòna cimvwà mumòne aci, bilondèshile cikèènà-kumòna cimvwà mumòne pàngàkalwà bwa kubùtula cimenga aci aci; ne cikèènà-kumòna aci ciwà cifwànàngàne ne cikèènà-kumòna cimvwà mumòne lwà ku musùlù wà Kebààla aci, nenku mèmè kupòna mutwè mpàla panshi.

Nenku butumbi bwa MUKALENGE—butumbi bwa MUKALENGE bwàkabwelela mu nzùbu lwà ku njila wa ku ciibi cìwà citàngile lwà ku esètè aci.

Pa nanku nyuma wàkantuntumuna, ne wàkambweja mu bulà bwa munda, nenku, mōnaayi, butumbi bwa MUKALENGE bwàkuuja nzùbu awu tètè.

Nenku mēmè kumuumvwa wàkula naanyi pambèlù pàà nzùbu, ne muntu awu mwimàne ku luseke lwànyì.

¹²⁰ Dyela dya maanyi, dyela dya maanyi dya Ntempelu awu bwa dikòokesha dya mu Bukalenge bwa bidimu cinunu. Mpindyewu monaayi mu Lewitiki. Mpindyewu tàngilàayi numòne mwàkajidiibwàye mu Lewitiki. Mpindyewu, twètù baalùkile mu Lewitiki, tudi tusangana ne Mòsà ngwàkeela ntempelu awu maanyi. Twánjàayi anu kukwàlukila patùcidiku apa. Tudi ne dībà búngì bukumbàne bwa kucyènza. Nenku twàlukilàayi mu Lewitiki bwa tūjandulè pàakeelà Mòsà ntempelu awu maanyi apu, mu Lewitiki nshapitā wa 8.

¹²¹ Kaa, mēmè ntu anu munange kupàlakaja Mifundù ne Mifundù. Nwènù kanwènakù bacinangè anyi? Nenku pashiishe nudi—nudi nupetakù anu ci—ci—cingènyingenyi cya citùdì—cya citùdì munkaci mwa kukèba ne citùdì munkaci mwa kwenza. Mpindyewu, yònsò wa kunùdì mmufikè ku dyumvwa ne tudi tukwàta mudimu ne Mifundù kampànda ku musangu ne ku musangu, pa bwalu abu.

¹²² Mpindyewu, nshapitā wa 8 wa Lewitiki, ne mēmè ndi mufunde kaaba aka, mvensà wa 10. Fùndaayi Lewitiki 8.10. Tūmonàyaabi.

Nenku Mòsà wàkangata maanyi a dilaabiibwa, ne wàkapòngolola maanyi a dilaabiibwa, ne wàkeela nntentà wa kusambakeena maanyi ne byònsò bivwàmu, ne wàkabìjidila.

Nenku...wàkaàmyamina pa cyoshelu misangu mwandamutekète, ...wàkeela cyoshelu maanyi ne mpànzà yònsò ayi, ne cyowelu ne dikàsà dyàci, bwa ne...bwa kubìjidila.

Nenku yèyè wàkapòngolola...maanyi a dilaabiibwa pa mutu wà Aalònà, ne wàkamwela maanyi, bwa kumujidila.

¹²³ Mòsà, mu cipèelà, ùjidila, anyi wèla nntentà wa kusambakeena wa dikuukwila awu maanyi, bwa bânà bàà Izaleela pàwàbo mu lwendu apu. Wàkeediibwa maanyi.

¹²⁴ Mpindyewu, mu Kulondolola Mwibìdì, buulùlaayi, nenku netùmonè dijidila dībà dyàkangatà Nyuma Mwimpè cisòmbedi Cyèndè mu nntentà wa kusambakeena, kadi nùtangilè nùmonè cidì cyenzèke mpindyewu. Mu Kulondolola Mwibìdì nshapitā

mwi5, túbangilàayi ku mvensà wa 13. Kulondolola Mwibídi nshapítà mwi5, kubangila ku mvensà wa 13.

Nenku kwenzekabi...ne, pàvwà mpungi ne bimbi bàà misambu...bwa kwenza bwa diyì dimwe kuumvwikadi... ditumbisha ne disàkidila dya MUKALENGE, ne pààkabàndishàbo mèyi àbò ne mpungi ne byamù bya dikùmakaja ne byombelu bya mìjiki, ne bàtumbisha MUKALENGE, ne bimba ne: Bwalu yèyè ùdi mwîmpè, ne luse lwèndè lùdi lùshààla kashidi, kwenzekabi díbà adi ne nzùbu wàkuula tètè ne ditutu, ne nzùbu wa MUKALENGE mene,

Mu mushindu wà ne baakwidi bààkiimana... baakwidi kabàvwa mwa kupeta mushindu wà kukwàta mudimu to bwa ditutu adi to, bwalu butùmbi bwa MUKALENGE bwàkuuja nzùbu wa Nzambi tètè.

¹²⁵ Nzambi wàkabwela mu mwaba wà cijila wùvwà ne cya kwediibwa maanyi awu, ne wàkafidiibwa kùdiYe bwa bantu kwikalabò bàlwa bwa kukuukwila. Pa nanku, bwa kwela maanyi, kaciyi mwaba “wèbè wà cijila” to, kadi bwa kwela mwaba “Mutàmbe cijila” maanyi. Nenku tudi tumòna, ne, Yelusàlèmà Mupyamùpyà ki mwaba “Mutàmbe cijila.” Nenku dyela dya maanyi nedìikalè pa Yelusàlèmà Mupyamùpyà udi utùluka ùfùma kùdi Nzambi mu Dyulu, mulongolola mùdi mukàji-musela mulengejila bàyèndè. Dyela dya maanyi nedìikalè pambidi pààbò.

¹²⁶ Mpindyewu, pààkajidilà Zolòbàbèlè wèndè ntempelu awu, paanyimà pàà yèyè mumanè kwibakiibwa cyàkàbìdi, kààkeediibwa cyàkàbìdi maanyi to, bwalu ùkaavwa mumana kwela maanyi; ne wàkuupudiibwa, ne wàkiibakiibwa anu cyàkàbìdi cyanààna. Dibùtudiibwa ndyàkamukwàtà. Ùkaavwa mwibakiibwe cyàkàbìdi ne mujuudiibwe, nenku kakùcivwa kabidi dimwela dya maanyi to. Pààkeediibwàye maanyi musangu wumwe awu, aci cyàkatungunuka, ne cìdi citungunuka too ne musangu ewu mene. Kadi pààjaadikà Nzambi Ntèntà wa mu Bukalenge bwa bidimu cinunu, Yèyè neèlè Mutàmbe cijila maanyi; kaciyi “wèbè wà cijila” to, kadi “Mutàmbe cijila.”

¹²⁷ Kadi pàngatà Mfumu Nkwasa Wèndè wa butùmbi bwa bidimu cinunu, (Butùmbi's wè!) kwajiki bwèndè yèyè mpindyewu. Dyela dya Mutàmbe cijila maanyi ki cìikalà cintu cya ndekeelu cyènzekà. Pààshiibwà Ntèntà awu; dibìikà dya ku lufù dyènzèke; beena Yudà baalùkile; Kilisto ne Mukaj'Èndè-musèla balwè; beena Yudà, binunu lukàmà ne makumi anaayi ne binaayi batwibwe citampi; Bukalenge bwa bidimu cinunu bukùmbàne. Nèkwènzekè dyediibwa dya maanyi pèediibwà Mutàmbe cijila maanyi; mwaba wà cijila, Mutàmbe cijila wa bàà cijila, ne Mutàmbe cijila. Pàdìbi ne, mwaba Mutàmbe cijila ki ntempelu wuwwa Nzambi musòmbèle, pankaci pàà Bakèlùbà.

Nenku, ewu musangu, Kilisto neàsombelè mu mwaba Mutàmbe cijila, ne dilaabibwa pambidi Pèndè. Ne bôbò kabààkwikala ne dijinga ne dîbà dya muulu muntwamu to, bwalu Mwânà wa mukooko munkaci mwa Cimenga ngwîkala Bukênkè abu. Dîbà kadyàdyàkubwelakù mu cyôci Cimenga aci to, mùvwà Uncle Jim wa kale ne ciibidilu cya kwamba. Ne kadyàdyàkubwelakù to, bwalu Kilisto ngwîkala Bukênkè abu, Mwela maanyì awu. Ne Mfumu neâlwe kwangata Nkwasa Wendè wa butùmbi munda mwa bidimu cinunu, bwa kukòokesha.

¹²⁸ Yelèmiyà 3.12-18, mukùmbajila ku mikwabo ayi, tùmubalàayi. Mu Yelèmiyà nshapità wa 18 amu, ngeela meeji. Eyowa. To, nshapità wa 12, nùmfwilaayikù luse, nshapità wa 12 wa Yelèmiyà, nenku túbangilàayi ku—ku. . . Yelèmiyà 3, mfwilaayikù luse. Yelèmiyà 3, ndi—ndi mumufunde kaaba aka, mwaba wùvwà ne, pâmvwà munkaci mwa kulonga, Nyuma Mwimpè mwikàle anu ùnsàka eku ne eku, mêmè kufunda anu byôbì ebi ne mwànyì mwònsò. Yelèmiyà 3, ne pashiishe 12 too ne ku 18, mukùmbajila ku mikwabo ayi. Tùmubalàayi.

Ndà ùkopolè mèyì aa lwà ku nord, wamba ne: Alùkilà, wèwè Izaleela udi mutwè cimpingà awu, mùdi MUKALENGE wàmba; nenku ncyàkwenza ne ciiji cyànyì—cyànyì. . . kwenza ne ciiji cyànyì cìkupònènè to, bwalu ndi ne luse, mùdi MUKALENGE wàmba, ne ncyàkulamakù ciiji kashidi nansha.

Cibi itàbà bubì bwebwe, bwa ne udi mushipè mikenji kumpalà kwa MUKALENGE Nzambi webè, ne mutangalàjile mwenyi njila yebe mwinsì mwa mucì mubishi wònsò, . . .

Ki cidibo benzè ncyôci aci, kuumukila ku esètè, wesètè, ditungà ne ditungà dyònsò. Nwamònu anyi?

. . . ne kanwèna batùmikile dìyì to, dìyì dyànyì, mùdi MUKALENGE wàmba.

“Kùdimukàayi!” Tèèlejàayaaku eci.

Kùdimukàayi, Éyì bânà bajimine, mùdi MUKALENGE wàmba, bwalu ndi (m-u-n-ù-s-è-l- -e) . . . ndi munùsèle; . . .

“Mèsù àbò àvwa mafofomija, bwalu Ndi mupèeshe bàà Bisàmbà bya bendè mpungà. Kadi, alùkilàayi, bwalu Ndi munùsèle.”

. . . nenku nènnwängatè umwe mu cimenga, ne babidi mu dîkù, . . .

Kî mbònsò bàdi bàdibiikilà ne mbeena Yudà abu bààbwelà to. Kadi kasùmbù kasungula aku nkààbwelà, Beenyamìnà mwànà udi ujuukamù kumpalà kwa Yòzefù awu, kasùmbù kàà bàdi bàfuminà mu ditungà ne ditungà dyònsò, umwe mu cimenga ne cimenga cyònsò, ne mu dîkù ne dîkù dyònsò aku.

. . . *ne mêmè nêndwe neenu mu Siònà.*

Ne nênnùpèèshè mpaasàtà wa pa mwoyi wèbè, wanùdùsha dimanya ne dyumwa.

Ne nebyènzekè ne, panwàlwà bààbùngì ne bavùlàngàne mu buloba ebu, mu miine matuku awu, mùdi MUKALENGE wàmba, kabààkwamba kabidi ne: Mu—mushèètè wà cipungidi wà MUKALENGE to; anyì kacýàkulwa nansha mu meeji to; anyì kabààkucivùluka to; anyì kabàà—kabààkucyèndelakù. anyì kacýàkwenjiibwakù kabidi to.

Mu cikondo aci nebàbiikilè Yelusàlèmà ne nnkwaswa wa butùmbi wa MUKALENGE, (bwalu Yèyè neikalému, nwamònu's), nenku ditùngà dijimà nedikungwilè (aleluuyah) kùdiye, ne dìnà dya MUKALENGE, kùdi Yelusàlèmà; anyì kabààkwenda kabidi bilondeshìle meeji àbò bóbò biine mu bubì bwa myoyi yabo nansha.

¹²⁹ Apu mpèèdiibwà Cimenga aci maanyi. Apu mpèèdiibwà Yelusàlèmà Mupyamùpyà awu maanyi. Ne matùngà ònsò a Cimenga. . . Mu Bwàkabuulwibwà nshapità wa 22, mbambè ne biibi kabyàkukàngiibwa bufùku to, bwalu kamwàkwikala bufùku to. Ne bamfumu bònsò bàà pa buloba nebàlwe ne luumu lwàbò ne butùmbi mu Cimenga eci. Bimanu byàcì nebìikalè bya mabwe a yaspà ne sardoine, mabwe mishindu dikumi ne yibidi; ne biibi dikumi ne bibidi nebìikalè bya dibwe dya busàngà dimwepele dyangàtàngàne, dimwe ku ciibi ne ku ciibi cyònsò. Kamwàkwikala dijinga dya kàndeyi to. Kamwàkwikala kabidi muunyà to, bwalu Mwànà wa mukooko udi munkaci mwa Cimenga awu ki wìkala Bukènkè. Ne Yèyè neàlombolè bantu Bèndè ku Mwoyi wà kashidi. Nemwìkalè micì yibidi miimàne, wumwe ku luseke ne ku luseke lwà musùlù, ne yòyi yidi bwa dyondopiibwa dya ditùnga. Ki Mwela maanyi wàlwa awu, Cimenga cya Cijila cidì cipweka cifumina mu Dyulu kùdi Nzambi, cilwa pa buloba.

¹³⁰ Twàngatàayi mpindyewu cyènzekà munda mwa ciine cikondo aci. Kaa, nudi bacìnangè anyi? Tùbuululàayi mu Yeshàayi 65, katanci kakese cyanàànà. Mbitàmbe bwimpè bya kabiyi kutùpika. Mbitàmbe bwimpè bya kabiyi kulekela. Nkufwànyine kwikala luuya lukolè ndambu, kadi twànjàayi anu kutùngunuka.

¹³¹ Yeshàayi 65, tèelejàayi cyènzekà munda mwa ciine cikondo aci. Anji anu kudìkonkàkù, mulunda wanyi ngènzàmpèkààtù, ní udikù—ní udikù mwa kupanga kupeta cyòcì eci. Yeshàayi 65, tubangilàayi lwà ku mvensà wa 17. Tèelejàayi, bantu bònsò, ne ntèmà mpindyewu. Emu mmu cikondo cya Bukalenge bwa bidimu cinunu amu, pàdi Mutàmbe cijila wèdiibwa maanyi.

Bwalu, mōnaayi, nēmfukè maulu mapyamàpyà ne . . . buloba bupyabūpyà, ne bya kale abi kabyàkuwulukiibwa kabidi, anyi kuwilangana mu meeji to.

Kadi ikàlaayi . . . ne disànka ne cyònkòkòkàayi . . . mene bwa bīndi mfūka abi, bwalu, mōnaayi, ndi mfūka Yelusàlēmà . . . ndi mfūka Yelusàlēmà, (ki Yelusàlēmà Mupyàmūpyà nyawu), disànka, ne cisàmbà cyèndè disànka.

Dyela dya maanyi ncinyi? Disànka dya Mukalenge.

. . . mfūka Yelusàlēmà disànka, ne cisàmbà cyèndè disànka. Ne mēmè nēncyonkòkòkè mu Yelusàlēmà, . . .

Mfumu mu Nkwasa wa butùmbi, pa ngiikàdìlù wa ùkèmesha wa Nkwasa wa butùmbi, Nkwasa wa butùmbi wa Cyendeleele, ne cisàmbà cya Cyendeleele ciikàle ne disànka dya Cyendeleele mu Cimenga cya Cyendeleele! Kaa, ekelekele!

Ne mēmè nēncyonkòkòkè mu Yelusàlēmà, ne disànka mu cisàmbà cyànyi; ne dīyi dya mwadi kadyàkuumvwikakù kabidi munkaci mwèndè to, anyi dīyi dya mbilà.

Kamwàkwikalakù kabidi . . . mwànà wa matùkù, anyi muntu mukolè udi kàyi mūje matùkù èndè to; bwalu mwànà neàfwe ne bidimu lukàmà, kadi ngènzàmpèkààtù mwikàle ne bidimu lukàmà neèdiibwè mulawu.

Ne bōbò nebūibakè nzùbu, ne nebàsombelèmu; . . . nebàkunè mvinyò, ne bōbò nebàdye tumuma twàyi.

Kabààkwibaka, bwa mukwabo kusòmbelayèmu nansha; (mbwena kwamba ne, wèwè ufwa ne mwaneebe wa balùme wàngata kaaba keebe) . . . kabààkwibaka, bwa mukwabo muntu kusòmbelayèmu nansha; kabààkukùna, bwa mukwabo kudyàye bya pa madimi abi nansha; bwalu anu mùdi matùkù a mucì amu ki mwikalà matùkù a bantu bàanyi, ne basungula bàanyi nebàsankilè ntàntà mule midimu ya byanza byabo.

Kabààkukwàta mudimu mukolè bwa pàtupù nansha, anyi bàpòdla bwa lutàtu; bwalu bōbò bàdi dimiinu dya mubènesha wa MUKALENGE, ne bààbò bàna ne bōbò.

Ne nebyènzekè ne, . . . kumpàlà kwa kubūkilabò, mēmè nēngàdamunè, . . . (Dyediibwa dya maanyi dya butùmbi adi, paanyimà pàà Mukèlùbà!) . . . Mēmè nēngàdamunè; ne pūikalàbò bàcidi bààkula apu, mēmè nēngūmvwè.

Mbwa wa diitu ne mwànà wa mukooko nebidiilè pāmwè, . . . nyama wa ntambwe neàdye bisoosà anu mùdyadyà cimpàngà cya ngombe amu; bwa lupwishi

kaayi ki lwikalà cyàkudyà cya nyòka. Nenku byòbì kabyaàkwenzelangana bibi anyi kubùtulangana pa mukuna wànyì wónsò wà cijila nansha, mùdì MUKALENGE wàmba. (Udikù mwa kucipangila anyi? To!)

¹³² Anji alùkilaayi paanyimà apa cyàkàbìdì, Yeshàayi wàkula cyàkàbìdì, mu nshapità wa 11, mvensà wa kumpàla too ne ku wa 9. Tèelejàayi cidìye wàmba kabidi kaaba aka, pàdìye ùpeta cikèènà-kumòna, paanyimà pàà mumanè kumòna bakàji abu, mushindu wikalàbo bènza maalu mu matùkù a ndekeelu. Ni- . . . Ee, Yeshàayi 11, ku 1.

Ne nekùpatukè dikombo ku kaamuci kàà Isàayi, . . . Ditàmbà diikalà mwa kutòlokela ku miji yèndè; (Uvwa nganyi awu? Kilisto.) . . . ku miji yèndè.

Ne Nyuma wa Mukalenge neàsombelè pambidi pèndè, nyuma wa lungènyi, wa luumvu, nyuma wa mubelu . . .bukolè, nyuma wa dimanya ne . . .dicìinà dya MUKALENGE.

Ne neàmuvwijè wa luumvu lwà lukasa mu dicìinà dya MUKALENGE, ne yéyè kààkulumbulwishila ku bìdìye ùmòna ne mèsù èndè nansha, anyi . . .ku bìdìye ùmwva ne maci èndè.

Kadi ne bwakàne yéyè neàlumbulwishè bapèle, ne neàkandameenè bubì bwàbò bwa bapòlè bàà pa buloba; ne yéyè neàtuutè buloba ne dikombo dya mukana mwèndè, ne ne mupùuyà wà ku mishìkù yèndè yéyè neàshebeyè beena lwonji.

Baakàne nebàdisenyè mufungu wàbò, ne beena lulamatu nebàdiswikè mukàbà wà mu cifùkà cyabo.

Ne mbwa wa diitu kabidi neàsombelè pàmwè ne mwànà wa mukooko, ne nkàshààmà neàlaadilè panshi pàmwè ne mwànà (ki mbuji awu); ne kànà kàà ngombe ne kànà kàà ntambwe ne bimunà bya maanyi . . . anyi kànà kàà ngombe, anyi nyama wa ntambwe ne bimunà bya maanyi kaaba kàmwè; ne mwànà mutekète neàyilombòlè.

. . .ngombe ne nyama wa ours nebidilè pàmwè; . . . twànà twàyì (ne) netùlaadilè panshi kaaba kàmwè, ne nyama wa ntambwe neàdye bisoosà anu mùdyadyà ngombe amu.

Ne mwànà wa ku dibèele neànayilè pa bwinà bwa nyòka wa dicyulà, ne mwànà mulekeesha dibèele neèlè cyanza cyèndè mu bwinà bwa nyòka wa mpaapija.

Kabyàkwenzelangana bibi anyi kubùtulangana mu mikùnà yànyì yónsò ya cijila ayi nansha, bwalu buloba nebwikalè bùle tètè ne dimanya . . .anu mùdì màyi mabwikile mbù amu.

Hum! Amu's mmu Yelusàlèmà Mupyamùpyà amu's. "Wa mupyamùpyà" awu. *Ditàmba*, kaaba aka, nditéèdiibwe, bu Ditàmba dya Davidi. "Yéyè ùdi byònsò bibidi Ditàmba ne Mùtòlokù wà Davidi."

¹³³ Mpindyewu, paanyimà pàà eci, Mukàji-musèla ùdi ùmwènèka. Paanyimà pàà mbingu makumi mwandamutekète, Mukàji-musèla ùdi ùmwènèka mu Bwàkabuulwibwà nshapità wa 19, mvensà wa kumpàla ne wa 16. Ùdi ùfika ne Mubàki Wendè, Mfumu wa bukole. Kaa, ekelekele! Ncyèna mumanye ní twacyàngata cyònsò anyi to. Tudi naaci anu bwa . . .

Ee, twànjàayi anu kubala citùpà cyà cyòci eci, nansha bishi. Ki pààfika Mukàji-musèla mpòpò apa, paanyimà pàà cyòci eci. Nwamònu anyi? Paanyima pàà Bukalenge bwa bidimu cinunu bumanè kujaadikiibwa, dîbà adi Kilisto ùdi wàlukila ne Mukàji-musèla. Cya bushuwa, 1 too ne ku 16, wa nshapità wa 19.

Ne paanyimà pàà maalu aa . . .

Paanyimà pàà Dikenga dinene edi; paanyimà pàà Makènga; paanyimà pàà Bitampì; paanyimà pàà Bipùpù; paanyimà pa diipaciibwa dya Sàtaanà; paanyima pàà dijaadikiibwa dya Bukalenge bwa bidimu cinunu. Tàngilàayi!

. . . paanyimà pàà maalu aa ngákumvwa . . . dîyi dya bantu bàábúngi mu dyulu, bamba ne: Aleluuyah! Lupàndu, ne butùmbi, . . . luumù, . . . bukòlè, kùdi Mukalenge Nzambi wetù,

Bwalu dilumbulwisha dyebe ndya lulamatu ne dyakàne, bwalu yéyè wàkamana kulumbulwisha mukàji munene wa masandi awu, uvwa unyanga buloba ne masandi èndè awu, ne wàmanyi kusombwela mashi a basadidi bèndè ku cyanza cyèndè.

Ne kabidi yéyè . . . bóbò . . . Ne bóbò bàakamba kabidi ne: Aleluuyah! Ne mwìshì wèndè wàkabànda muulu bwa kashidi ne . . . kashidi.

Ki ekeleeziya-ndumbà wa kale nyéyè awu, "mwìshì wèndè wàkabànda muulu."

Nenku bakùlù makumi abidi ne banaayi abu ne nyama yinaayi ayi bààkapòna panshi ne bààkakuukwila Nzambi uvwa musòmbè pa nkwasà wa butùmbi awu, bamba ne: Amen! Aleluuyah!

Ne dîyi adi dyàkapàtukila mu nkwasà wa butùmbi, dyàmba ne: Tùmbishàayi Nzambi wetù—Tùmbishàayi Nzambi wetù, nwènù basadidi bèndè bònsò, ne nwènù bàdì bà mucìina, ne bakese ne banene.

Nenku ngákumvwa byenzè bu ne cìvwa ndîyi dya musumbà munene, . . .

Tèelejàayi! Ki bwalu abu's, Ekeleeziya. Paanyimà pàà Yèyè mumanè kubànda mu nshapità mwi3, ki Yèyè ulwàlwa ewu. Nwamònu anyi? Nenku mvnsà mwi6 mpindyewu.

Nenku ngákumvwa byenzè bu ne civwa ndiyi dya musumbà munene, ne bu dîyi dya mâyi àbúngi, ne bu dîyi dya mukungulu mukole, dyamba ne: Aleluuyah! bwalu Mukalenge Nzambi wa ngulu yònsò ùdi ukòokeshà.

Aleluuyah! Tàngilàayi! Dibàkà dya Mwànà wa mukooko didi dilwa mpindyewu. Ki Mukàji ulwàlwa ewu.

Tùsankàayi ne túcyonkomokàayi, ne tùmupàayi luumù, bwalu dibàkà dya Mwànà wa mukooko dyáfiki, ne mukàjèndè wàmanyi kudìlongolola. (Ki Yèyè ulwàlwa ewu, bònsò babidi, Mukàji-musèla ne Mubàki.)

Ne mukaji bàakamupà bwa kuvwàlayè cilàmbà cya linà mufinùnùke, cikezùke ne citòòke, bwalu cilàmbà cya linà mufinùnùke cidi. . . mbwakànè bwa bansantu.

Nenku yèyè wàkangambila ne: Fùnda ne: Bàà disànka ng'aba bàdi babìkidiibwe ku didyà dya dibanjì dya Mwànà wa mukooko. Ne yèyè wàkangambila ne: Aa àdi. . . mèyi malelèlè a Nzambi.

Ki mèmè kupòna panshì ku makàsà èndè bwa kumukuukwila. Ki kungambilayè ne: Údìlamè bwa kwènji nanku to; mèmè ndi musadidi neebe, . . . bânà beenu ne bàdi ne. . . bânà beenu ne bàdi ne bujaadiki bwa Yesu, kuukwilà Nzambi, bwalu bujaadiki (bwa Kilisto) bwa Yesu bùdi nyuma wa cipròfètà.

Nenku nâkamòna dyulu dyunzulula, ne. . . kabalù katòòke; . . . (kaa, ekelekele!) . . . ne ewu uvwa musòmbepù. . . ùvwa ùbìkidiibwa ne ng'Wa lulamatu ne Mulelèlè, ne. . . ùdi ùlumbulwisha ne bwakànè ne ùlwangana mvità.

Ne mèsù èndè àvwa menzè bu ndimi ya kapyà, ne. . . mutù wèndè kùvwa bifulu bya butùmbi byàbúngi; . . .

Wàkaashiibwa cifulu cya butùmbi bu nganyì? “Mfumu wa bamfumu.”

. . . ne yèyè ùvwa ne dinà difùnda, divwà muntu nansha umwe kàyi mumanye to, pa kuumusha. . . yèyè mwine.

Ne yèyè ùvwa muvwàle cinkutu citòòke cizabika mu mashi, ne dinà dyèndè didi dibìkidiibwa ne Dìyi dya Nzambi.

“Ku cibangidilu kwàkadi Dìyi, ne Dìyi dyàkadi Nzambi. Ne Dìyi dyàkavwijiiibwa mubidi ne dyàkasòmbela munkacì mwetu.” Divwa Nganyì? Yesu.

...ne dìnà dyèndè didi dibìikidiibwa ne Diyì dya Nzambi.

Ne bilwilu bivwà mu dyulu bivwa byènda bimulonda pa tubalù tutòoke, bavwàle bilambà bya linà mufinùnùke, bitòoke ne bikezùke. (Butùmbi's wè! Ki Yèyè ulwàlwa ewu.)

Ne mukana mwèndè mùdi mùpàtuka mwelè wà mvità mutwè, wùdì...ne bwa kutuutawù ditùnga; ne... neàbàkòòkèshè ne dikombo dya cyamu; ne yèyè ùdi ùdyata mu cikàminu lwonji lwà ciiji cicolè cya Nzambi wa Bukolè bwònsò.

Ne yèyè ùvwa pa cinkutu cyèndè apu ne pa cibelu cyèndè ne dìnà difunda ne: MFUMU WA BAMFUMU NE MUKALENGE WA BAKALENGE.

¹³⁴ Cìvwa ncinyi? Bantu Bèndè bacìvwa bàfùminakù ku diMwasa cifulu cya butùmbi bu Mfumu wa bamfumu, ne Mukalenge wa bakalenge. Wàlukila ku Ntempelu Wendè wa cijila, mwela maanyi a Bwikadi bwa Nzambi, bwa kusòmbelamù ne kukòokèsha mu Bukalenge bwa bidimu cinunu pàmwè ne Ekeleeziya Wendè. Amen! Dimwènèka, pàmwè ne Mfumu wa bukolè awu, bwa kwangata kaaba Kèndè ku luseke lwa Mubàki, Ntempelu mupyamùpyà wa bukalenge mwela maanyi.

¹³⁵ Mpindyewu twipàcila tusambombo twà Bwàkabuulwibwà 6.1 too ne ku Bwàkabalwibwà 19.21 tülù.

¹³⁶ Tèèlejàayi mpindyewu, bwa kujikija. Bitampi Mwandamutekète, Mpungi Mwandamutekète, Mpànza Mwandamutekète, Makènga Asatu, mukàji mu dîbà, diipata dya dyabùlù, anyi dya dragon mukunze, bidi bilwa pankaci pàà bikondo ebi mu cikondo cya Dikènga dinene. Kanùbipu mwoyi to. Bintu byònsò ebi bìdi byènzeka munda mwa cikondo aci.

Kadi twipàcilà tusambombo twa dilwa Dyènde ntwòtò etu. Nudi nuciitabuuja anyi? Cikondo kaayi cya butùmbi cidi citèèkiibwe mu cibùcìlu bwa aba bàdi banangè Mukalenge's we! Ndi nkwabwila's, wèwè mulunda wanyi, katwèna mwa kupanga kumòna aci to. Kùcipangidikù to, cyùdi wenza nansha ciikàle cinyi. Ikàlà mutwishibwe!

¹³⁷ Mpindyewu, mu dyàlumingu dilwalwà, bu Mukalenge mwa kwanyisha, ndi muswe kuleeja, bu Yèyè mwa kunkwàcisha, kuleeja anu menemene mwaba wùdi dyònsò dya ku matùkù mwandamutekète awu, mwaba wùdiwu menzèkèle, mwikàle ntwàla cintu cimwecimwe—cimwecimwe cingènji leelu ewu eci, ne kuleeja misangu mwandamutekète ayi, mbingu mwandamutekète, mbingu makumi mwandamutekète mu mwaba mene wà ntempelu wa beena Yudà awu, ne kuleeja anu menemene mwaba wùtùdi twètù ne mwoyi ku ndekeelu eku, bu Mukalenge mwa kwanyisha.

138 Nudi baMunangè anyi? [Disangisha didi dyàmba ne: “Amen.”—Muf.] Nudikù bafwànyine kutwàla bwa kupangila Dyulu anyi? [“To.”] Tudi ku cikondo cya nshùikidilu!

CidiYe ùlwa kwenza ncinyi? Cintu cya kumpala cyènzeka, kumpalà kwa Yesu kulwaYè pa buloba, cintu cya kumpalà ciikalàku ncinyi? Ekeleeziya neikalè (cinyi?) mwambwibwe! Yesu nealwe pa buloba ne wènda wènda too ne ku lukitá, wèla papa ne maman mwoyi ku cyanza, wákula neetu bõnsò kaaba aka, kadi ùbànda ùya anyi? To!

Nebiikalè bishi? Nenku...Tudi tunwàmbila cyòci eci, ku—ku Diyì dya Mukalenge ne: “Twètù bàdi ne mwoyi ne bashààle...” Teesàlònìkà Mwibìdì, nshapitá mwi5: “Twètù bàdi ne mwoyi ne bashààle too ne ku Dilwa dya Mukalenge, katwákucyàmakana anyi kupangisha bàdi balààle tulù to. Bwalu mpungi wa Nzambi neàdilè; bafwè mu Kilisto nebàjuukè dyàmbedi; ne twètù bàdi ne mwoyi ne bashààle netwàmbwibwè pàmwè naabò bwa katwilangana ne Mukalenge mu mpeepèlè.” Netwàngaciibwè mu katanci, mu mubunyi wà dísù. Mu cyòci cikondo aci, aci cidi cijikija Cikondo cya Ekeleeziya.

139 Pashìishe, pànu pa buloba Nzambi ùdi ùbanga kukwàta mudimu ne beena Yudà. Nekwikalè bapròfetà babidi. Nshapitá wa 11, netwàngatè cyòci aci. Bapròfetà beela maanyi babidi, bu Eliyà ne Mòsà, bàndi mémè ngeela meeji ne mbòbò. Ne bòbò nebàtwalè milawu minene, paanyimà pàà bamanè kumòna ne bàamanyi kudyèza cimùkù, ne Loomò mushipè cipungidi cyèndè, mfumu awu.

Munkaci mwa lumingu lwa makumi mwandamutekète elu, neàshipè cipungidi cyèndè ne Loomò, anyi Loomò neàcishipè ne Izaleela, ne necyènzè ne cinyangu cibangè kutangalaka. Ne nekwikalè dipaasalala dinene, piikalà bashààdilè bàà Bisàmbà bya bendè, baavirgo bakütàkàne...Dragon awu, Loomò, wàkapwidija màyi a mukana mwèndè, bwa kwela bashààdilè bàà dimiinu dya mukaji bàdi balamè mikenji ya Nzambi abu mvitá. Loomò ngwènza cyòci aci.

140 Nsangilu wa maèkèleeziya neàbàswikè cimùkù, ne neàbwejè beena Yudà mu mwine nsangilu ewu, ne neàbàlùjè cyàkàbidì ku dikuukwila dya mu ntempelu wabò sungasunga, mu EMU MMÛDÌ MUKALENGÈ WÀMBA wa mu Bible, nenku nebiikalè ne ekeleeziya wabò sungasunga.

141 Bàdi cinyi mpindyewu? Ndi mfùma ku dicibàkula mpindyewu mene. Ncipyacipyà. Bàdi mpindyewu ditùnga, dimanya. Mmwómò anyi? Kadi kí mbanji kwikala ne dikuukwila dyabo dya mu ntempelu to. Kadi pàatèkàbo dikuukwila dya mu ntempelu, Ekeleeziya neikalè mumanè kuya. Nzambi neikalè ùkwàta mudimu ne beena Yudà bu ditùnga. Nenku pààbwejiibwàbo mu nsangilu ewu, Loomò neàcishipè munkaci mwa cidimu cya makumi mwandamutekète, bidimu bisatu ne

citùpà, yêyè neàshipè naabò cipungidi aci, ne neàjuulè cinyangu aci cidi cyènza bwa kabùtu kutangalakakù too ne ku dikumbana dya maalu ònsò. Pashìyè yêyè neàngatè ne beena Mishònyì, ne beena Yudà, ne neàbàkèngèshè. Mu cyòci cikondo aci, bapròfetà babidi aba nebàjuukè ne nebèlè buloba mulawu, bwa mvula kàlòkupù to munda mwa matùkù a cipròfetà cyabo awu. Ne bôbò nebàbiikile Kapyà bwa kufùmakù mu Dyulu, ne bikwabo byònsò. Indilaayi anu cyanàànà. Tudi naabi bùngì cyanàànà kaaba aka, bitùtèekela mu diyeebà, bya diyiila.

142 Kaa, Yêyè's n'Nzambi munene wa dikèma's! Taatu wa luse kaayi! Balunda bàanyi, lekèlaayi ngàmbè nunku, mémè bu mpaasàtà wenù. Kanwèna bamanyè dyèsè dinudi naadi mu nsòmbelu wenù to. Kanwèna bamanyè to. Kùdi bantu banene bàabùngì, kùdi bansantu bàabùngì, kùdi binunu bya bantu bàà cijila bàdi bafwè mu bidimu ya kale, bantu bùle tètè ne Nyuma bàvwà bafwànyine kwikala banangè kumòna ditùkù dinudi nwènù ne mwoyi edi. Nwènù ne mémè tùbwelelàayikù pa cyòci aci.

143 Cikwabo cidi cikèngela bwa twètù kutàngilakù ncinganyi? Ncinyi citùdiku mwa kwenza paanyimà pàà cyòci eci? Kutùyaaya nkwèpi? Cùikalà mwa kwenzeka ncinyi? Bìkèngela tùye mwaba kampànda. Kwèna mwa kushààla apa dîbà dyònsò to. Udi mwa kukòsa mashìndà èbè; lumingu lùdì lùlondà bìkèngela àkoshiibwè kabidi; eyowa, misangu yibidi, kumpàlà kwa diine dîbà adi. Udi mwa kukolesha bàna beebe. Udi ubàdiisha cyàkudyà cya mundaamuunya; pa dîbà dya cyàkudyà cya dilòòlo nzala yibàsùma cyàkàbidi. Ubàdiisha cyàkudyà cya dilòòlò; nzala yibàsùma kabidi pàdìbu bùcya mu dinda. Udi umusùmbila mukòlò wà bisàbaatà; bôbò biikàle mùdì bàanyi mémè aba, ngondo mitwè ku yibidi anyi yisatu udi umusùmbila mukòlò mukwabo wà bisàbaata. Wèwè mumùsùmbile bilàmbà ngondo ewu; mu ngondo umwe anyi yibidi udi umusùmbila bilàmbà bipyàbipyà. Nwamònu anyi? Kakwèna cintu cidi citùngunukà to nansha cimwe. Kakwèna cintu nansha cimwe cya cishìndàme to. Kakwèna cintu nansha cimwe cidi mwa kushààla to.

Kwàlakanyi mabanji a pàtùpù a pa buloba ebu to,
 Àdi ànyangukà lùkàsà aa,
 Ibàkilà ditèkemena dyebe pa bintu bya
 Cyendeleele,
 Byòbì kabyàdyàkujìminakù to!

Bikondo mbyùle ne dishintuluka dya cimpicimpi,
 Cintu nansha cimwe pa buloba kacyèna mwa
 kushààla kaciyi cinyungishiibwa to,

Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cìdì kaciyì
cìshintuluka!

Kwàta ku cyanza cya Nzambi cìdì kaciyì
cìshintuluka!

Kwàta ku cyanza cya Nzambi cìdì kaciyì
cìshintuluka!

Ibàkilà ditèkemena dyebe pa bintu bya
Cyendeleele,

Kwàta ku cyanza cya Nzambi cìdì kaciyì
cìshintuluka!

Tèèlejàayi:

Pààjikà lwendu lwetu, (Yèyè neàtùmanyishe
dìbà dyàjikàlu.)

Byòbì ne tuvjà ne lulamatu kùdì Nzambi,
Cisòmbedi cyetu cilenga ne cya cìbàlakana mu

Butùmbi aci, (Cimenga cyela maanyì aci.)

Musùuka wètù mwambwìbwe newùcimòne!

Kwàta ku cyanza cya Nzambi cìdì kaciyì
cìshintuluka!

Kwàta ku cyanza cya Nzambi cìdì kaciyì
cìshintuluka!

Ibàkilà ditèkemena dyebe pa bintu bya
Cyendeleele,

Kwàta ku cyanza cya Nzambi cìdì kaciyì
cìshintuluka!

Kwàlakanyi mabanji a pàtupù a pa buloba ebu
to,

Àdì ànyangukà lùkàsà aa,

Ibàkila ditèkemena dyebe anu pa bintu bya
Cyendeleele,

Byòbì kabyàdyàkujiminakù to!

Kwàta ku cyanza cya Nzambi cìdì kaciyì
cìshintuluka!

Kwàta ku cyanza cya Nzambi cìdì kaciyì
cìshintuluka!

Ibàkilà ditèkemena dyebe pa bintu bya
Cyendeleele,

Kwàta ku cyanza cya Nzambi cìdì kaciyì
cìshintuluka!

Patùdì twinyika mitu yetu apa, pawikalà kacya kùtukù
mwanji kukwàta ku Cyanza Cyèndè to, kwènàku anu mwa kulwa
kucìkwàta mpindyewu anyi?

Kwàta ku cyanza cya Nzambi cidi kaciyi
 cishintuluka!
 Ibàkilà ditèkemena dyebe pa bintu bya
 Cyendeleele,
 Kwàta ku cyanza cya Nzambi cidi kaciyi
 cishintuluka!

¹⁴⁴ Wèwè mwànà wa bakàjì mutekète, ùdi kansongààkàjì kakese kalenga mpindyewu. Tusukì twebè ntulenga, tutàmà twebè ntwenzè bu twa rose. Kadi, udi mumanye, s'anù leelu ne mààlabà ewu, twòtu atu, netùfwatalalè. Tudi bamanyè munyi ní lumingu lwàlwà biinya kabyàkwikala bìdya, mu buloba, twine tutàmà tulenga, tukese, twa rose atu?

¹⁴⁵ Mwaneetu wa balùme mutekète, wèwè udi ne dikàndà, munene, ne mahùndà makolè; udi ne mwoyi wùzùka bikolè. Kadi paanyimà pàà cikondo, anu mààlabà ewu, nsukì milenga ya mvwàngalà ayi, neyitùùke, ne tukese tuwàshààla naatù atu netwàndamukè mvya. Makaaya manene malulàme awu, neàkobamè, ne biinya nebidye mu mabòkò ne mu misunya amu. Nebàkwambùle bàye neebe, bàkwele mu lupwishi.

Pa nanku, ibàkilà ditèkemena dyebe pa bintu
 bya Cyendeleele,
 Byòbì kabyàdyàkujìminakù to!
 Kwàta ku cyanza cya Nzambi cidi kaciyi
 cishintuluka!
 Kwàta ku cyanza cya Nzambi. . .

Ndi muswe wòlolè cyanza bwa kulenga ne kupeta cyanza Cyèndè mpindyewu.

Ibàkilà ditèkemena dyebe pa bintu bya
 Cyendeleele,
 Kwàta ku cyanza cya Nzambi cidi kaciyi
 cishintuluka!
 Pashiishe pààjikà lwendu elu, (lwàdyàkujika,
 dingingà ditùkù.)
 Byòbì ne wèwè uvwa ne lulamatu kùdì
 Nzambi,
 Cisòmbelu cyebe cilenga cya cibàlakana mu
 Butumbi aci,
 Musùùkà wèbè mwambwibwe newùcimònè!
 Bwa cinyi kùyikù ukwàta ku cyanza cya
 Nzambi cidi kaciyi cishintuluka!
 Kwàta ku cyanza cya Nzambi cidi kaciyi
 cishintuluka!
 Ibàkilà ditèkemena dyebe pa bintu bya
 Cyendeleele,
 Kwàta ku cyanza cya Nzambi cidi kaciyi
 cishintuluka!

146 Mémè nkàadiku mumòne bintu byàbúngì, bidimu bitwè ku makumi asatu ne cimwe mu cyambilu emu. Nkàadiku mumòne bintu bya dibungama; nkàadiku mumòne bintu bya butùmbi. Cintu cya citàmbe kwikala cya dibungama cínkaadiku mumòne kacya bândela... Nansha múnkaadi mumòne bânà báfwa ne nzala mu mùsèèsù; nkàadikù mumòne baamaamù balòmba kàà pa luse kàà kapesse kamwe kàà dyâmpà. Cintu cya citàmbe kwikala cya dibungama cínkaadiku mumòne, nkumòna muntu, muntu wetù ewu, uvwakù ne cya kwikala mwànà wa balùme wa Nzambi, ùfwa kàyi mumanye Nzambi to.

147 Ndi mvùluka muntu mukàji mwimàne ku ciibi dilòlò kampànda, ku ciibi cya ekeleeziya ewu, ùnseka. Kwambayè ne: “Ncyènàku mufwanyine kulekela wanyi ngombe mémè bwa kwikalayè ne ntèndeleelelu wa bwena udiyè nendè yèyè awu nansha!” Dìbà dimwepele ndile, kumbiikishabò ku lùpitaadi. Mukàji mulenga kumòna’s, wa bidimu bitwè ku makumi abidi ne bibidi, ùvwa wèla mbilà mikolè ne: “Lwâyi ne muyiishi awu kaaba aka!” Ùvwa mwena Katolike, ku diitabuuya.

Pàngàakayàku, mwaneetu wa bakàji mukùlumpè awu kwambayè ne: “Wáfiki pashiishe mupicishe, Mwaneetu Branham. Mmufwè kùkaadi tusunsa tutaanu.”

Mémè ne: “Ndikù mwa kumumòna anyi?”

Yèyè ne: “Ùvwa wèla mbilà mikolè ùkukèba, mu méyi èndè a ndekeelu ne: ‘Kangàtaayi muyiishi awu, Mwaneetu Branham awu!’”

Bâyendè ùvwa mwaba awu, wèla mikunda ne: “Mwenzèlèku disambila’s! Enzàku disambila’s!”

Mémè kwamba ne: “Dìbà ndimane kupita bwa mpindyewu.”

148 Mémè kupwekesha mbùlankète. Ùvwa ne mèsù manene menemene mafikùlùke. Mukàji mulenga kumòna; ne tuntòbengelà tukese tukese lwà kwìsù kwònsò eku; ne nsukì ya cisengàsengà; ùkoka ntema be. Úkaavwa mutàte bikolè mu mushindu wà ne tuntòbengelà atu tùkaavwa tumwenzè bijùji kwìsù aku bu mpùsù. Mèsù èndè àvwa madyundè mapàtùke ne mu bimpòkòmpòkò byàwù, nunku ewu. Ne, mu bushuwa bwa bwalu, mala èndè ne twonyi bikaavwa bivundùlùke, bìdi mu—mu... Muntu yònsò ewu ùtu wènza aci pàkaadiye ùpunga ne lufù, bantu pàmwè ne bònsò. Nenku ki yèyè awu, mulàadika mu mushindu awu, ne mukana mulekelela. Ne bilàfinyi byèndè ebi, bìvwa bibwikile ndambu citùpà cya cifiikùlùke cya mèsù aci. Mémè ncyàdyàkucipwakù mwoyi to. Ki musambu awu kumvwilawù nu meeki ne.

Kwàlakanyi mabanji a pàtupù a pa buloba ebu to. (Bulenga bwa kwìsù, bintu bya mikùùkùku).

149 Nkààdikù mwimàne ku luseke lwà muntu mulùme kampànda anu mu Port Fulton emu, ùpùnga ne lufu. Kumbiikidishabò ku luseke lwà bulààlù bwèndè. Kadi ngâkasambilakù nendè ku cyoshelu eku dilòòlò kampànda. Ùvwa mwelè mukàjì kampànda dibòkò kunshingù. Mémè kwamba ne: “Umùshà dibòkò kunshingù kwa inábànzá awu.”

Yèyè ne: “Ndi mmulombola kùdi Nzambi.”

150 Mémè ne: “Kí nne dibòkò dyebe dimwela kunshingù to.” Mémè ncitu ngiitabuuja bintu bya mushindu awu to. Kumfiikilayè munda. Kupàtukayè pambèlu wènda ùtwa mikùmà.

Mémè kuya kùdiye, pashiishe ndambu, pàkaavwàye ùpùnga ne lufu. Kuntàngilayè mumpàla, kwambayè ne: “Kùnsambididi to, Mwaneetu Bill. Ndi mujimìne. Kwànyì nkumanè kujika.” Yèyè ne: “Byònsò bínkaadiku mupetè abi, mbiyè.”

151 Mvwa mwimàne anu lwà pambèlu apa mu disangu, katanci kípì ndambu ne kaaba aka, dîngà ditùkù, kwa muntu mulùme kampànda uvwa mumbiikidishè ku luseke lwà bulààlù bwèndè pàkaavwàye ùpùnga ne lufu. Yèyè ne: “Mvwa mémè misangu yònsò anu muswe *bikampànda ne bikansanga ne bikankèngà*, ne *bikampànda*.” Yèyè ne: “Kadi kacya ncitukù mukwàçile Mukalenge mudimu to. Misangu yàbùngì ntu anu ndikànda bwa kuya ku cyoshelu.” Yèyè ne: “Mwaneetu Branham, sambilàku bwa Nzambi ènzèku bwa mwanàànyì mukese wa bakàjì wàfutakù cibawu cya bintu bìndì mémè mwenzè abi. Pàmwàpa yèyè ùdikù mwa kwenza cintu kampànda bwa Mukalenge.”

152 Mémè kwamba ne: “Aci kacýèna mwa kwenzeka to, mwaneetu. Bintu byúvwà mwa kwikala wèwè mwenzè abi mbijimìne.” Hum!

153 Ngâkiimana ku luseke lwà muntu mulùme kampànda, kumumòna ùlwangana mvità ne baadémons munda mwa mèbà makumi abidi ne anaayi. Wamba ne baadémons bàvwa biimàne ku luseke lwà bulààlù bwèndè ne mìnýòòlò midijingila munshingù. Kwambayè ne: “Kabànkwaçikù to!” Wèla mbilà mikolè; bàmulaminyina mu bulààlù. Kwambayè ne: “Nyèyè udi mwimàne wàwa. Kanwènaayikù mwa kucimòna anyi’s? S’ncyaci cyènda cìndonda.” Ùkaavwa mulààdikijèlààdikije Nzambi, ntàntà mupitèpite bule. Ùvwa ne mayeebà manene mùle tètè ne bisoosà bya kwelela nyama, mùle tètè ne blé, ne tubalù tulenga twà mbilu ya dipiiyangana. Cidimu cimwe kumpalà kwa ciine aci, wàkeela Nzambi mulawu mumpàla, mutàpe mukàjèndè mapì ne bwalu ùvwa muyè mu tabernacle. Nudi bamanyè cyàkenzekà anyi? Nkùbà kutuutayè ku diyeebà dyèndè adi, ne kushebeyayè tubalù twèndè atu, kwosha bisoosà byèndè bya kwelela nyama abi kubibùtula bùtùbùtù. Ki mulùmýànà awu kufwàye mpalù ya mushindu kampànda, ùlwangana bwa kumusha baadémons pambidi pèndè.

154 Kadi mulunda wànyì kampàndà wa kale (butùmbi's wè!) mwimàne kuntu kwàka, kufikayè kundeeelu kwa njila wendè. Mémè kwamba ne: "Ukààdi uya anyi, papa?"

Yèyè ne: "S'ki lwendu elu, Billy."

Mémè ne: "Bìdi bìshi?"

155 Yèyè ne: "Bilenga be." Yèyè ne: "Lwâ ne bânà bàànyì ku luseke lwà bulààlù eku." Kutentekelayè yònsò wa ku bânà bèndè abu tuubyanza twèndè twà kale tutekètàngàne atu e kubàbèshayè. Kwambilayè bânà bèndè babidi bàà balùme, kwamba ne: "Nkwàtaayi byanza, nùbìbàndishè muulu, mwàkenza Yoshùwà ne Kaalèbà amu." Tuvwa tudìkonka cìvwàye muswe kwamba's. Kwambaye ne:

Ditùkù dya disànka, ditùkù dya disànka,
Kacya Yesu wàkùpula mpekaatu yànyì!
Yèyè mmundongèshe mwa kutàbala ne
kusambila,
Ne kwikala ne nsòmbelu wa dicyònkómoka
ditùkù dyònsò.

Tudi ne bimwe bya ku bintu abi bya difikakù's, balunda bàànyì! Kakwènakù muntu nansha umwe udi kàyì ùjinga kudya cyàkudyà cìmpè, kwendela mu màshinyì malenga a kàdyèndelandelà, kwikalakù ne bya bitàmbe bwìmpè bitùdi mwa kwikala naabi to. Ncyèna mmudyula yèyè awu to. Abi's mbìmpè. Nzambi mmuswe bwa wèwè kwikala ne byòbi abi, kadi:

Kwàlakanyi mabanji a pàtupù a pa buloba ebu
to,
Àdi ànyangukà lùkàsà aa,
Ibàkilà ditèkemena dyebe pa bintu bya
Cyendeleele.
Byòbi kabyàdyàkujiminakù to!

Twèlààyaaku byanza muulu mpindyewu patùdi twimba apa.

Kwàta ku cyanza cya Nzambi cìdì kaciyi
cìshintuluka!
Kwàta ku cyanza cya Nzambi cìdì kaciyi
cìshintuluka!
Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cìdì kaciyi
cìshintuluka!

156 Patùcìdì biimànyine kuulu apa, tükudimukàayi anu cyanàànà tùlabulèku muntu kampànda ku cyanza mpindyewu. Netwikalè mwa kutùngunuka, ne disangisha, mu katancì kakese cyanàànà. Kadi ndi muswe bwa nùkudimukè patùcìdì twimba cìkwabo citùminyi cya musambu awu apa.

Kwàta ku cyanza cya Nzambi cìdì kaciyi
cìshintuluka!

Enza nanku, taatù! Enza nanku, papa! Kùdì Nzambi!
Enza nanku, nsongà! Enza nanku, mwaneetu! Enza nanku,
mwaneetu!

Ibàkilà ditèkemena dyebe pa bintu bya
Cyendeleele,
Kwàta ku cyanza cya Nzambi cìdì kaciyi
cìshintuluka!

¹⁵⁷ Kanwènaayikù ne disànka Bwèndè Yèyè anyi? Ambàayi
“Amen!” [Disangisha dìdì dyàmbe ne: “Amen!”—Muf.] Bònsò
bàdì baMunangè, ambàayi ne: “Tùmbishàayi Mukalenge.”
[“Tùmbishàayi Mukalenge.”] Bònsò bàdì biitabuuja ne nenuye
ku Cimenga cya nseke yinaayi ya mwomumwe aci, elàayi byanza
muulu. (Shààla mucilamè nanku, katanci kakese, ne musambu
wèbè awu.)

Ndi mu njila mutàngile ku Cimenga cilenga
aci, (Bìyaaya bishi mpindyewu?)
Cìdì Mukalenge mulongòlwèle Bèndè
Sungasunga;
Mwikalà bapikula bònsò bàà bikondo byònsò
Mwa kwimba “Butùmbi!” banyùngùlùkile
Nkwasa Mutòòke;
Míngà misangu ntu ngumvwa majiyà a Dyulu,
Ne butùmbi búngààbandilàmu:
Disànka kaayi dìikalàci, pàngààmònà
Musùngidi wanyì,
Mu Cimenga cilenga cya ngòlò aci.

Kanwènaayikù banangè aci anyi?

Ndi mu njila mutàngile ku Cimenga cilenga
aci,
Cìdì Mukalenge wanyì mulongòlwèle Bèndè
Sungasunga;
Mwikalà bapikula bònsò bàà bikondo byònsò
Mwa kwimba “Butùmbi!” banyùngùlùkile
Nkwasa Mutòòke;
Kaa, míngà misangu ntu ngumvwa majiyà a
Dyulu,
Ne masànka àngààbandilàmu:
Disànka kaayi dìikalàci, pàngààmònà
Musùngidi wanyì,
Mu Cimenga cilenga cya ngòlò aci.

Nudi baMunangè anyi? [Disangisha dìdì dyàmbe ne:
“Amen.”—Muf.] Nanku:

Angàtâ Dîná dya Yesu wëndè naadi,
 Wèwè mwânà wa tunyinyanya ne dikènga;
 Nedikupè disànka ne busàmbi,
 Nda naaDi kwònsò kúyaayà.

Dîná dya mushinga (Dîná dya mushinga!) Kaa
 dya bupòle be! (Kaa dya bupòle be!)
 Ditèkemena dya buloba ne disànkà dya Dyulu;
 Dîná dya mushinga, (Dîná dya mushinga!) Kaa
 dya bupòle be!
 Ditèkemena dya buloba ne disànkà dya Dyulu.

Mpindyewu, kanùpu mwoyi bwa mu dyàlumingu dilwalwà
 mu dînda to, pa dîbà citeema ne citùpà. Nenku dîbà adi
 netùteetè, bu Mukalenge mwa kwanyisha, bwa kujikija pa
 dîbà, bwa twamòna mwa kwenza disambila dya babèèdi, mu
 dyàlumingu dilwalwà mu dînda pa dîbà citeema ne citùpà.

Twinamina Dîná dya Yesu,
 Tupòna mikookwela ku makàsà Èndè,
 Mfumu wa bamfumu mu Dyulu netùMwasè
 cifulu cya butùmbi,
 Pààjikà lwendu lwetu.

Dîná dya mushinga, (Dîná dya mushinga!) Kaa
 dya bupòle be! (Kaa, dya bupòle be!)
 Ditèkemena dya buloba ne disànkà dya Dyulu;
 Dîná dya mushinga, (Dîná dya mushinga!) Kaa
 dya bupòle be!
 Ditèkemena dya buloba ne disànkà dya Dyulu.

Anjì tèèlejàayikù anu citùminyì eci:

Twinamina Dîná dya Yesu,
 Bu ngabu ku butèyi bwònsò;
 Pààkujìngà mateeta,
 Nungànà anu cyanàànà Dîná dya cijila adi mu
 disambila. (Aci ncyàmanà bwalu's!)

Dîná dya mushinga, (Dîná dya mushinga!) Kaa
 dya bupòle be! (Kaa dya bupòle be!)
 Ditèkemena dya buloba ne disànkà dya Dyulu;
 Dîná dya mushinga, (Dîná dya mushinga) Kaa
 dya bupòle be!
 Ditèkemena dya buloba ne disànkà dya Dyulu.

Mpindyewu ndi ngaaluja bulombodi bwa disangisha kùdì
 mpaasàtâ, Mwaneetu Neville, bwa kwambayè mèyi èndè a dyoya
 naawù ne cyònsò cidiyè mufwànyìne kwamba aci.



TWIPÀCÌLÀ TÙSAMBÒMBÒ TWÀ DIMWÈNEKELA
DYÀ DANYÈLÈ KÙDÌ NGABÙDYÈLÈ LUA61-0730E
(The Sixfold Purpose Of Gabriel's Visit To Daniel)

DILONDANGANA DYÀ MALONGESHA PA MBINGU MAKÙMÌ MWANDAMUTEKÈTÈ YÀ DANYÈLÈ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyalumingu dilòlò, mu matùkù 30 a ngondo wa mwandamutekète, cidimu cya 1961, mu Branham Tabernacle mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2023 VGR, ALL RIGHTS RESERVED

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org